


ЮРИЙ
ВАСЮТОВ



Исайя
В



ЮРИЙ ВАСЮТОВ



Кӧйдыса во

Кывбуръяс, поэмаяс

СЫКТЫВКАР
КОМИ КНИЖНОЙ ИЗДАТЕЛЬСТВО
1990

84 Ko—5
B 20


B 4702310200 — 006
М 128(03) — 90

22 — 90 м

ISBN 5-7555-0225-0

© Ю. К. Васютов, 1990.

КЫВБУРЪЯС





ЧУЖАН МУ

Коми му — Сöвет мунымлөн пельöс,
Парма-вөръяса вой-югыд муным.
Кыла «Емва» и чошкöда пельöс,
Оз-ö «Удора» содтöдөн шуны.

Воркута и, Ухта и, Печора, —
Ставөн матынöсь меным да асöсь:
Вола быттöкö рöдвужъяс дорö,
И оз дöзмыны, вола кöть дасысь.

Коми му — тайö потанöй менам,
Менам сьöлöмын ичöt му шарöй.
Шог и синва ме öтнамөн вена,
Меным нюмъялö кö Сыктивкарöй.

РАС

*С. Г. Чавайнлөн,
мари кыв вылысь.*

Эм менам ай-мам му вылын веж рас,
Став вөр-ваыслөн югыд мичлун пас.
Том чальяс костын сьылö колипкай,
А орчча тыын эжöра гож сай.

Ты ласта пöлөн дзоридз тыра эрд
Да сэтöръясөн озыр лөнъ ты берд.
Вөр тыö усьö дурзян, сөстөм ёль
Да колипкайкөд вензьö: дзоль да дзоль.
Мем тайö раскыс ай-мамöй кодъ ас...
И ёра сийöс, кодi
Кералö веж рас.



Поэтөн, гижысьөн он чуж,
Кöть вирад олöны и генъяс.
Он весиг сёрнитнысö куж —
Тадз быттьö тшöктöмаёсь енъяс.

Но воас кад, но воас лун
И вөрзяс дойясысь став лысьöм,
Кыв бөрся кыв — и вошис ун...
Тадз пырö сьөлöм пытшкö висьöм.

Но тайö висьöм абу лёк,
Кызд, шуам, насмук ли, чахотка:
Тэ сьөлöмын Есенин, Блок
Да нöшта уна мукöд кодкö.

Век тэнö кыйöдö выль мөвп
Да тöдтөм гуö тэнö йöткö.
Тэ быттьö аснад эн и вöв —
Йöз вöсна сьөлöм овны тшöктö.



Ме ола и долала
талунъя сынӧднас,
став йӧзыскӧд ӧтлаын
таляла мусӧ,
кӧн овны ме кола,
гӧрд кумачӧн дӧлала,
вой саридзлань колльӧдла
юсьсӧ
и юсӧ.

Ме шуда.

Мем нимкодъ:

ӧд чужан му — Россия.

и нюжалӧ кузя,

и паськалӧ паськыда,

а сәні кӧ кола,

кӧть мед сӧмын ӧтилы,

ме сыла и сёрнита

ас кылӧн,

веськыда.



Ме, гашкӧ, тәныд

парма йылысь висьтала,

кӧн медводз садьмӧ кӧк,

а сәсся тар;

кӧн ачым

юяс, ёльяс йылӧ письтыла,

кӧн менам чом,

а кодзувкотлӧн

кар?

Ме, гашкө, тэныд
парма йылысь висьтала,
көн котралёны
йёра, коч и көр;
көн ассым ньылём
ордымъясө кисьтавла
да кадён, мудзёмла,
ог төкөтьё и пёр?

Ме, збыльысь, тэныд
парма йылысь висьтала,
көн сьылё көин,
ворсё-брунгё ош;
көн чери-яйсё,
овлө, весиг сисьтыла,
мед визув тулан
пемыдас эз вош,
а пырис меным лэчкө, налькйё, пыльёмö,
дай мудер руч мед воштіс ассыс ис...
Мед эз жö вош став олёмöй да вылёмöй,—
ме тэныд сиа парма йылысь висьт.



Эм коми ань.
Сьöd вадъяс сьлөн эмось.
Ме наö вöйи —
пöдi-ö, эг пöд...
Эм коми ань.
Оз мыччы ки,
ог кевмысь.
Оз радейт кө,
мед оз и радейт мөд.

Көні дзебсясьö таланыс?
Мыйла мазыслөн ма?

Чайта, сямён кыссьö водзö
Вöрса уджач кодзувкот,
Чайта ме, и тури-дзодзöг —
Ачыс лэбысь и пилот.

Сöмын мыйла тадзи колö,—
Кодкö гөгөрвоö, оз?..
Быдөн öтчыд светас олö,
Быдөн олö сэн
ас моз.



Зэв гажаа ме коллялі томдыр,
Вом дорысь нюмöй менам эз и куслыв.
Тадз ассьым нэмöс овны көсийи пыр,
Мед эз и ямлы сьölөм шöрысь муслун.

А öнi шуö кодкö: тэ пö скөр,
И син-пельыд пö тэнад вывтi зумыш...
Мый сöмын шудөн Му вылас он төр,
Ме томдырйиö мыйлакö эг думышт.



Ме книга радейтi,
кор лыддисны вок-чой,
кор лыддисны бать-мамöй;

и ачым бишур дорын,
кор вөвъяснымос вердіс
 тувсов вой,
ме олі ставнам
 книга шыын-горын.
Став олөм-бурыс —
 книга вөлі мем,
ме сэтчөс йөзкөд
 сералі и бөрді.
Ме книга радейті —
 дзик ставыс сәні эм...
Но олөмыскөд төдмаси ме
 бөрти.

ВОИС ТӨВ

Усис лым и воис төв,
Шондіа да көдзыд.
Страдна быттьө эз и вөв,
Кынман питшөгөдзыд.
Пон ку шапка, ыж ку пась
Тэрыбджыка кышав.
Паччөр вылө кайис кась,
Воис кад пө: дышав.
Но оз дышав коми морт,
Некор сылы, некор,
Эновтөма шоньд горт
Летка, Додз и Кекур...
Жургө ягын удал зон
Электропилаөн,
Вөралысь (тшөтш сылөн пон).
Кайө угоддьө.
Турун доддьөн — тракторист,

Посни войтыр — лызьён.
Сьодасьома ты и вис
Төвся вуграсьысьён.
Шонді. Енэжтасыс лөз.
Сөстөм еджыд лудыс.
Төвлы радуйтчöны йөз,
Быттьö сэні шудыс.

МЕ

И овла галстука
и галстуктөм,
и новла джинсы и капрон,
и шула: «Чолөм!»
Шула: «Здравствуйте!»
Ме —
Коми муысь
коми зон.
Көть гөра-көдза,
көть ме велөдча,
көть трактор доддяла,
көть вөв.
Ме, ковмас, шойчча,
ковмас, зэлөдча,
мед сотö шонді,
ярмө төв.
И ола сиктын-ө ме,
карын-ө,
мем муса брейк-ө,
класс-балет,—
ог көсйы некор лоны
баринөн,
и раб,
дерт, меысь оз жö пет.

МЫЙЛА НӨ?

*Бокысь воём войтыр частō
шуоны коми мортос комикон.*

Мыйла нө, ме коми кō,
Шуан менō комикон?
Али чукыр плешкōй
Менам сэтшōм тешкодъ?
Али мудзōм синъясысь
Кусōны би киньясыс?
Али мыйла чота,—
Тэнад кынōм потō?
Мыйла нө, ме коми кō,
Шуан менō комикон?
Чукырōсь кō плешкōй,—
Мулы уджйōз вешта.
Синъясōй кō куньсьōны,—
Вояс сэтчō сунсьōны.
Чота кō ме кокон,—
Вөр-ва вуджлі подон.
Мыйла нө, ме коми кō,
Шуан менō комикон?

ФЕДЕРИКО ГАРСИА ЛОРКАЛОН ПАМЕТЬЛЫ

Михаил Дудиньсь

Правилōяс паньд оліс Лорка,
Овны корō кадьс сідз поэтōс.
Оліс, сьыліс, сьыланкылас мортыс
Ошкис муслун, коді абу светас.

Таысь со и лыйлісны поэтōс,
Шонді лэччōм бōрын бокын-ылын,

Съыланкылөс дзебисны кюветас,
Да и зывөк лои сэк му вылын.

А палачьяс Лорка вирьсь гөрдөсь,
Вомъясаньс кылыс медся ёран.
Сөмын йөзыс ньөжйөнника бөрдис,
Лоркабыслысь съылан съылис горөн.

Съыланкывйын — аскиыслөн юөр —
Бара сувтис лыйлөм нин поэтыс.
И, кыз асья шондыслөн югөр,
Ловзис муслун, коді абу светас.

БУЛАТ ОКУДЖАВА ЭСТРАДА ВЫЛЫН

Марк Соболюсь

Лавра корьясысь веноч пыр — көнкө медбөрья
«ура!»...
Телекамераяс дасьөсь и юпитер сотчө яр.
Төдліс сійө, мудзөм витязь, небыд сыв и печик
дой,
Төдса Му пасьятыс: очки, сөстөм дөрөм, рудов ной.
Сійө виччысьөдны вермө, мед коть сотө тэнө гож,
Сэсся нюмдө, кыз тай лэбач, аддзө кор ид тыра
пож.
Тэнө видзөдлас рентгенөн, синнас вөтлас налысь
дум,
Коді чайтө, мый оз серав пөтка-лэбачыс, оз нюм.
Но гитаратөг он вермы, өні сытөг оз нин позь,
Сөмын сійө, быттьө ковтом, дыр на босьтө и оз
босьт.
Босьтис. И оз виччысь козин, съылө, прөста съылө
морт.

Тi он аддзöй, мый эстрада — кок ув му и дзебан
 горт.
 Эк, гитара тэ, гитара, зэлыд струна — гижöд визь!
 Сбылі вылын öшйöм гезйын ассыд мыла звöнтö
 кисьт.
 Тэнад колиц дзользьöм шыын кылö ылö кольöм
 кад:
 Войвыв парма, степь да море, паськыд Волга
 дорын сад.
 Мый көть гласыс бокö кежлö, ставсö нотаö он
 йöрт,
 Сбылöм — олöмыс поэтлөн, сэсся нинöм, ен ни
 чöрт.
 Йöзсö öтувтысь гитара море сайын тöдліс дон,
 Сывліс көн Кавказлөн быдтас да Арбатлөн удал
 зон.
 Ачыс неуна держава, көть и ашöр, торъя морт,
 Шевалье * де Окуджава, — гөгөрвоан-ö тэ, ёрт?
 Шуас мудера, мый слава — тайö, вокъяс,
 нинöмтор.
 Синмас видзöдласыс наян, ачыс некодöс оз ёр.
 Мыкыртчöма, чуньсьыс кисьтö йöзлы нориник
 мотив.
 Кытысь сылан тайö письтö, видзö кутшöм
 кымөр-шив?
 Олөм-вылöмыслөн шыыс мортöс вөрзьöдтөг оз
 коль,
 Со тай, менам шуда синмысь гөгыльтчö нин синва
 моль.

* Шевалье — Шевалье Морис — Францияса тöдчана поэт да сбылысь.

МЕНАМ НАРОДЛЫ

Сильва Капутикянысь

1

Ни синва шор, ни серам гор —
Оз нинём менё тэысь торйёд.
Ни ошкатор, ни вёйпантор —
Оз нинём менё тэысь торйёд.
И тадзи — нэм,
Быд лун, быд здук
Дзик öти тэ йылысь став сёрни...
И олём кутас менам орны —
Оз нинём менё тэысь торйёд.

2

Пасьтась, пöдлась, важён колис
Тэнад тулыс — воö тöv.
Игнав, паметяд мый колис,
Сипты öшинь — воö тöv.
Йöйкөд вензёмö эн кутчысь,
Венны кадыд кө оз судзсы.
Идрав ассыд урожайтö,
А то ачыд колян пайтөг.
Лым нин усьö — воö тöv.

3

Тэ öти кинад меным бур сиан,
А мöднад вöчан сьöкыд дой.
Тэ менö тогöдан кузь юрсйöd
И сэн жö горöдчöмыд: «Ой!»

О, чужан муёй, менам мамукёй,
Он аддзы, кутшөм өдйё пышйё
Тэ дорё тэон дойдөм кагукыд
Да юбка бөждорад и өшйё,
Мед кольны сэтчө синва войтсө,
Мед кольны тэон вөчөм дойсө.

4

Ме ёртъясөс вошталі. Ёртъясөс нуис
Кузь олөмөд нюжалысь туйыс.
О, кымын оз пыравлы сёйысь ни юысь,—
А мыжа мөй мунысьлөн туйысь?
Но абуөсь орччөн и найё, код олөны...
Шог — найёс-ө? менё-ө? — суис.
И со ме дзик өтнамон чөла зэв сулала,
Көн тыртөм да лөнъ шылъыд туйыс.

5

Кулөмаөс ошкө быдөн,
Ловъялы — бур кылыс абу.
Нөйтам, дойдам, пурам, видам —
Дорйысь-жалитысьыс абу.
Дзедбан гу дорын ми бөрдам:
Сыысь бур эз вөв и абу...
Сэсса ставсө важ ног вөчам —
Тайё лёклы помыс абу.

6

Уна-этша-ө ме сеті
Олөмыслы,— ме ог төд.
Донаджык-ө сылан сямыс,
Сылысьыс-ө,— ме ог төд.

Унаысь ме сьылан пыдди
Бурджыкөн ки жмитлём лыдди.
Бура-ө ас нэмөс олі,
Лёка-ө,— ог, ме ог төд.



Бур плётникө ме ог и пуксы,
Ог шу: ме медся бур поэт.
Но корас кодкө: «Нолтө, тшупсы»,—
Ме мөдлы кыысь чер ог сет;
Но ковмас тэчны кө поэма,
Юшков мем сы вылө оз ков...
Ми олам, другө, сэтшөм нэмө,
Кор чер и перө лэптө лов.



Тэ кыин зарныысь браслет
Дай зарни чусі-часі,
Но сьөлөмөс ме тэн эг сет,
Эн ло тэ меным асөн.

Ог шу, мый зарни — ковтөм лөп.
Оз ырзы сійөн пачыд.
Но вөлін эськө тэ дзик мөд,
Кор зарни вөлін ачыд.



Вылджык йöзысь гажöй бырö сиктын,
Коді көть оз пырав, ставыс — ас.
Гожом шöрын öшиньтö көть сипты,
Öдзöс водзад сувтöд карнан-тас.

Пырас öти, дзайгö: «Юрöй висьö...»
Пырас мöд и корö: «Кисьт вай штоп!»
Коймöд, яндысигмоз, но удждысьö,
Нельöд ачыс пызан сайö — клоп...

Шуöма нин ставсö öта-мöдлы,
Вылъыс сöмын öти — табак тшын...
Корджык менö энöвтис, эг тöдлы,
Тöдсаясöй дорö муслун вын.

Пöрысьмисны быттö сиктса пиян,
Сöмын вина юöмыс и — гаж,
Быттö ставлөн, кыз тай серыс киам,
Чужöманыс ляскөм пасыс важ.

А ме көсья мыйкö выльтор кывны,
Да мед кывзі — паськөдöма вом.
А ме көсья тöдтөм морткөд сывны,
Да мед менсьым сьылөмöс эз пом.

Мед и ачыс асьыс сьөлөм востис
Да ме сэнi олі көть нин здук...
Көвтөм важыс сьөлөмöс тай косьтис,
Шудöс-шогöс некодкөд ог юк.



Бара өтнам ю вылө ме петі,
Визулыскөд вензё тэрыб пыж.
Бара ыджыд вөля аслым сеті,
Кык лун кежлө эновті ёсь тыш.

Эм идея, сійөс венны доръя,
Кыдзи дорйис асьсө Галилей.
Ёртлөн мөвпыс менам мөвпысь торъя,
Кыдзи Войвыв Көшкөд Водолей.

Мыйла вензя? Кодлы тайө колө,
Оз кө дорйы менө Ыджыд Чин,
Век кө мөвпөй чужанінас олө,
Кыдзи шонді улын куньса син?..

Лыа көдж со кольө, изъя керөс.
Юрсиясөс летө скөрмөм төв,
Видз-муыслөн уна рөма серыс
Метөг быттё тани эз и вөв.

Нөрыс вылө сувтас вон-палатка,
Чөвта вугыр, көн тай ваыс лөнь,
Бипур дорын чери тыра латка
Вунөдөдас төрытьясө скөнь.

Сэн и көклөн мудзөмла со сыввсис,
Сөмын дзуртө көнкө пукөд пу...
Бырас кө став вензёмыс Му вывсьыс,
Вөр-ваыстөг коляс эськө Му.



Тэ кывбуръясөс менсьым вай эн кулит,
Мед ёрас, эм кө ёранторйыс, мөд,
Вай некор тэ эн мыччы меным дуля,
Кор лыддян сэтысь «еджыд» пыдди «сьөд».

Эн мырсьы, быттьө төдан быдтор бура,
И критик — лыа-яя ловъя морт.
Му вылас өти эм Литература,
И сылөн, другө, аслас лэбан борд.

Мед сійө олө-вылө светас тэтөг,
Но тэтөг ме Му вылас мед эг ов.
Өд кодыр нюмыд тэнад вомысь петө,
Оз мөй нө сэні дзонь поэма ов.



Коді эскас менам висьөмлы,
Кодлы кылө менам дой.
Сөмын төдса аслам лысьөмлы,
Кымын «ой!»-көд узьө вой.

Юрөс кодкө быттьө нөшалө,
Коскө тувъялө ёсь тув,
Сьөлөмөс жар биөн пөжалө,—
А ме кула да ог кув.

Кодкө дум вылө на усьөма:
Уджйөз сеттөм, шутөм кыв.
Өти ыдждөма, мөд юсьөма,
Некод «ой!» ни дой оз кыв.

Кодлы колө менам висьомой,
Шмонит:— Кула!— дась нин горт...
Кытчөдз кутас менө лысьомой,
Мед жө орчөн муса ёрт.

ГӨРӨДЪЯС

ТОМЛУН

Быд озырлуныс тайө мортлөн эм:
И зарни кёлысьыс, и эзысь юрыс.
Но, быттьө ставсө сетис, шуис мем:
— Збой томлуныд став олөмас и бурыс!

МЕДЯ СЬӨКЫД

Ой-ой, сьөкыд уджйөзаён лоны.
Уджйөз сетны — суйны яяд пурт...
Медя сьөкыд медбөръяён воны,
Медводдзаён воны кө эн кут.

ОЗ ЯНАВНЫ

Кыз сөмын янөдлісны юысьяслысь юр:
Шөр нэмын домавлісны сюръя бердө пасьтөм.
А вомө киссьө, киссьө вина-сур...
Ой, он тай домав сюръя бердө асьтө.

КОР БУРДЖЫК?

Тэ кө вына — копрасьоны,
Жеб — туй вывьыд тойлаласны,

Озыр — зептад видзөдөны,
Гөль — ки сетны яндыясны,
Нималана — завидьтөны.
Джөмдан-усян — таляласны,
Кулан — бурөн нимөдасны.

МУСУКАСЬӨМ

Кодкө абу прөста шулөм:
— Мусукасьөм абу грек.
Көзяинлысь көк туй нюлөм
Көзяинлы муса век.

ВЕЛӨДЧЫСЬ

Велөдчысьлөн өти мог:
Мед эськө эз шусы «ог».
Он кө төд да он кө куж,—
Тэ эн велөдчыны чуж.

СИКТСА ПРОБЛЕМАЯСЫСЬ

Гындей вурис швечлы гач,
Швечыс тэчис сылы пач,
Тюни гындіс көті вурись...
Овлө тадзисө оз бурись.

ДОНЫС РӨМЫН

Лымйыс еджыд, йиыс лөз,
Ваыс рөмтөм. Сідз и йөз:
Кутшөм көть мед эн вөв көдзыд,
Тыдалана — бур кувтөдзыд.
Рөмтөгыд и зарава
Абу олөм сетысь ва.

АВРАМОВТӨГ СПЕКТАКЛЬ

Ме төрыт видзөді спектакль,
Сэн эз нин ворс Иван Аврамов.
Друг ковмис эновтны мөд акт,
Өд кути унмовсьны ме рама.

МАМЛӨН БУР КЫВ

Мен мамө шуліс: «Юны — ю,
Да румка пыдөсө эн видзөд».
Мый вина румка — усян гу
Мам гөгөрвоөдлывліс сідзи.

АДДЗИМ ШУД

Ми олім-зыксим кымөс-кымөс,
Эз бурөд весиг эзысь көлысь.
Кор бордъялім ныв-пияннымөс,
Сэк шудсө аддзим пөла-пөлысь.

ӨТКА ОЛЫСЬ

Кор дзевсис вөртас сайө шонді,
Да тыртөм жырйыс чөла пемдіс,
Сэк сөмын гөгөрвоны пондіс,
Кыдз сыысь гажа томлун эндіс.

И ВОТӨС АБУ КОКА

Вөрын вотөс, йөрын вотөс,
Пызан вылын абу вотөс.

Кодос мыжавны мем, кодос,
Эг кө көмавлы тшайподос?

ВЕЖАЛЫСЬ

«Гулюяслы майбыр овны,
Некодось дзик налы повны». —
Сөмын мөвпышти ме тадзи,
Гулюос кань вомысь аддзи.

ӨТИ ОЛӨМ

Юралысьяс юралөны,
Уджалысьяс уджалөны,
Чунялысьяс чунялөны,
Кокалысьяс кокалөны, —
Өти сынөд лолалөны,
Өти олөм оларөны.

ПРАМОЙ МОРТ

Прамөй мортыд абу тувсов көкыд,
Прамөй мортлы овны медся сьөкыд:
Кувтөдзыд оз позь ни пөръявны, ни гуны,
Веськыда дзик ставсө колө синмө шуны...

КРОССОВКА

Заграницаө ме вола,
Судзөді путёвка, —
Куті котравны да, колө
Судзөдны кроссовка.

ИГАНА МУСЛУН

Ме нинөм лёкторсө эг вöч,
Кöть менö тэ и видан-а,
Ме сöмын шуи: синмыд — жöч,
А морöс кудйыд игана.

ПИСКА

Ог ю ме вина, весиг сур,
Ог ю «Московскöй» водка,
Мед юас найöс кодкö...
Ме юа сöмын самöкур.

СЁ ШАЙТА

— Узь вай, зарни...
— Садьмы, сёшайт...
Пиöс донъялис бать-мам.
Быдмис пи.
Век корö сё шайт,
Зарни дона лоис сям.

КÖПЕЙКАА ДАЧА

Йöзкөд меліа да бурөн
Вузася ме квасөн-сурөн.
Кöпейкатöг лыддя сдача,
Кöпейкасьыс лэпті дача.

ЧАЙ ГÖГÖР

Контораын лунысь луно
Чай гөгөр и сёрни муно,

Самөвар и чайник эм...
Уджсө вöчө ЭВМ.

ЕН ТÖДЫСЬ

Колökö эскöй, колökö эн,
Кöнкö да кöнкö олö на ен.
Оз кö öд, кызди йöзассис ним
Сылөн, код гижсьылис век «Аноним».

СОФИЯ

Сук вөрөн тырём, быттьö тоша,
Кыз стөрöж сулалö Витоша.
А улын, быттьö мыччөм кыын,
Лöз блюдйын пукалö София,

София — кар, София — сад,
София — мич, София — кад.

Кар шöрас — Пилы мавзолей,
Сад улас — ай-мамлы музей.
Быд рöма дзоридза Тракия
Важ муын выльмö век София,

София — кар, София — сад,
София — мич, София — кад.

Тан тöдтөм другар киöd босьтис
И ассьыс сьөлөм меным восьтис.
О, кыз нö вок кыись ракия
Он ю тэ вöсна тан, София,

София — кар, София — сад,
София — мич, София — кад.

ВАРНАЫН КОМИ СЫЛАНКЫВ

Веж гыөн ворсіс Чёрной море,
Содз ваён мыссис Зарни лыа...
Июньса луныс быттё ори,
Друг кусіс-куньсис рытъя кыа.

Сап пемыд море ызгис-бузгис,
Дзик быттё мельнича сэн изіс.
А джынъя тöлысь öдва дзузгис,
Мöд рытлы быттё асьсö видзис.

А Коми муын öнi югыд,
Кöть вой шöр войö ем пыс аддзан...
Ой, шогöй, сьöлöмöс эн жугод,
Мед синва эз жö пет жаляддза.

И сэки сигудöклөн шыөн
Друг öти керка öшинь письтіс
Да, быттё моремыслөн гыөн,
Ме вылö «Шондiбанöй» кисьтіс.

И менам сьöлöм быттё сыліс,
И менö ваён быттё тыртіс...
Нор сьöлöмöс нö кодi кыліс?
Код менö тайö мойдас пыртіс?

А, гашкö, кодкö Усогорскысь,
Код вöлі уна во сэн «коми»
Да чужан муас казьтіс-ворсіс,
Кызд коркö узьліс вöрса чомйын?

А сыктивкарса кö артистъяс
Тан гöститöны выль гастрольын?..
Дыр сигудöклөн мыла висьтыс
Содз ваён дзольгис парма ёлын.

АЛБЕНА

Жарыс паськөмтө пөрчөдө-кульө,
Быттьө лелькуйтө тэнө бур мам.
Весиг каляыс, быттьөкө гулю,
Керка вевт вылын пукалө рам.

Аслас ас кодьнас чуймөдiс менө
Ваө келысь нейджыд курорт.
Нимыс сьөлөмө инмис — Албена,
Быттьө нюмъевтiс мича ныв-ёрт.

Ачыс муыс тан дивө да шемөс,
Роза дзоридзыс, нөбъяв — оз ков...
Эськө олі тан став ассьым нэмөс,
Эз кө Комиын сьөлөмөй ов.

ГАБРОВОСА ШМОНЬЯСЫСЬ

Габровоса йөзыд скупөсь,—
Кывзы, он кө төд,—
Чегас габровеч нянь тупөсь,
Видзөдлас — и пөт.

Гөсти локтiн кө, эн янды,
Кокнад өдзөс восьт,—
Эн мөй козинъяссө вайны
Кыкнад киад босьт.

Дас ур воштөма детинка,
Синва — шорөн брызь.
Сетi сылы дас стотинка,

Бөрддзис ёнджыка детинка:
— Лоис эськө кы-ызы!

Каньлысь бөжсө вундө-шырө
Сяма габровеч,
Медым каньыд өдийө пырө,
Көдзыдсө оз лэдз.

Мельнича и, кысян стан и,
Токарной станок
Лун-вой уджөдөны тани,
Оз ков электроток

Важ ног «доддялөны» ватө,
Прөста мед оз кывт,
Зэв-ө дона киловаттыс,
Зептыс мед эз кыв.

Габровечөс горшөн шуны
Абу вывти бур,
Экономия визь нуны
Кужө сылөн юр.

КЫК КЫВБУР

Станка Пенчеваысь (Болгария).

1

Миян сөрмөм муслуныс —
Йөзлөн йөрысь өмидз,
Ниа пуыс лыстөгыс —
Пөтөм мөслөн рөмидз.
Арся розья лежнөгыс —
Мелі баба гожөм...
Дыр на эськө кежтөгыс
Мунны өти вожөд.

Тэ кыв он шу, көть тэкөд мый ог вөч —
 Ме здук кежлө и падмыла и чуйма.
 Вом тырын ма, вом тырын вина сөдз,
 Шөвк юрси тэнад морөс вылам куйлө.
 И меным шоньд, ывлаын көть төв,
 Көть кадыс вой, а синъяс водзын югьд.
 Ог корсь ме тэысь сөмын аслым пөв —
 Ме вая дой, тэ вайөмсө он дугөд.
 Ме олөм пом тэд вая: чөв да кын.
 А ставнас горзө вөр-ваыс: — Тэ муса!
 И паськөм усьө, кьдзи бырөм вын,
 Да ме тэ водзө пидзөс вылө уся...
 Тэ кыв он шу, көть тэкөд мый ог вөч,
 И тэ кодь жө ме лоа сэки стөч.

СӨВМӨМ МУСЛУН

Гожөм, гожөм, сьөлөмын тэ олан,
 Зэра, өдъя сьөкьд страдна кад,
 Номъя-лөддза...
 А вот сідзи колан,
 Весиг гутыс-гагыс дзизгө, рад.
 Видз вылө
 Быд усьөм ньылөм войтын
 Ворсө-сьылө
 Зэлалөм быд сөн.
 Оз и помнит весиг
 Сиктса войтыр,
 Сымда вынсө чөжліс кор да көн.
 Гожөм, гожөм — вотөс-тшака вөр-ва,
 Шойччысь йөза буса карса пляж...
 Гожөм, гожөм, дзоридза, ма көра,

Тэын нинөм абу лёк ни важ.
Дойыс бурдө, сьökыд шог кө сулис,
Чайтсьö, мöдысь юр вылö оз усь.
Сöвмö кöйдыс.
Гожöм — сöвмöм тулыс.
Сöвмöм муслун
Видзö сöвмöм тусь.

ВЕЖ ЛУД ВЫЛЫН НЫВ-ЗОНЫС ОЗ СЫЫВ

Мый нö лоис — öтвыв дугдiм сьывны,
Вошис сиктса уличаысь хор,
Бытьö гöльмис сьыланөн му вывным,
Бытьö жебмис йöзлөн сьылан гор?

Сьылö асьсö ачыс композитор,
Бард-геолог öтнас брен-н да брен-н,
Пöтан-кольман рок-ансамбльлөн зыкөн...
Көн нö сьыланкылыс — тэн да мен?

Тувсов лунö кыпыд да выль сьылан
Важөн нин оз горöдлы ныв-зон,
Веж луд вылын бара нин со кылан:
— Ноко, точнитöй магнитофон!

Сьылö, дерт, оз лёка Пугачёва,
Гöлöса-й Леонтьев, земляк-морт.
Но кор чöласны, ми ставөн чöлам,
Бытьö чегö сьыланнyslөн борд.

Некодi выль сьыланкыв оз нюжöд,
Бытьö быдөн лои пöтсьыс пöт.
Бытьö мортыс пöтны сöмын кужö,
А мед вердö эськö сийöс мöд.

— Воис дзескөдөмлы пом!

Ми шуим:

аски

пырам коммунизмө,

көн олөм-вылөм —

ас му вылын рай.

А коді олө сэн,

капитализмын,

мед катаклизмын

аддзас ассьыс пай.

Мед сісьмө сэн,

вой төлысь көдзыд улын,

а миян

водзө дөлөдө караб.

Эм кормчөй сюсь,

и — аттьө Совет мулы!—

карабын абу

весиг өти раб.

Тан шуда челядь,

тан пионерскөй лагерь,

тан школа,—

велөдчы!—

тан шондіа Артек...

А кымын

батьтөг-мамтөг кольө кага,

оз төд и ачыс

Воркутаса «зэк».

О, страшнөй вөт...

О, полысь батьяс-мамъяс...

О, ен пельөссиянь дзоргысь Маршал-Ен...

О, кача сора

нитш сора

нянь граммъяс...

Рыт-асыв костын сулалысь «Көрт

стен»...

Война, война...

Тэ ыджыд грек и слава.

Тә пыр оз тыдав,
вирыс съөд-ө, гөрд.
Код колим ловъя,
ставөн эским, ставөн...
И весиг батытөм-мамтөмыс эз бөрд.
О, ай-мам сиктөй,
кытөн өтик керка,
дзик өтик труба
путшкө еджыд тшын.

А кымын тани
вөвлі Карко, Серко,
кор йирсьөдлім ми найос
ыб дорын...

Ми абу тшыгось.
Көть нин сыысь аттьө!

Ми, мөдарө нин,
пөтсьыс лоим пөт.

Ми госөн тырим,
потө импорт платтьө...

А съөлөм пытшкын
палявлытөм вөт.

А съөлөм пытшкын
гымалө «Аврора»...

А съөлөм пытшкын
Ленин водзын мыж...

Ме аслым сабля
кыв-булатысь дора:

көн революция,
сэн пансьылө и тыш.

СЁРМӨМ МӨВПЪЯС

Кор нө сёлөмным чорзёма, кытөн?
Кытчө дзёбсьёма ёрт йылысь мөвп?
Мыйла вөйим вещьизмө да бытө?
Мыйла семьяаным лад ни төлк?

Нывлөн зарниысь чунькытш и чусі,
Пилөн «ИЖ» мотоцикл, ыж ку пась...
А став олөмыс быттьөкө күсі,
Менө пасьвартны ныв-пиян дась.

- Мыйла телекыс абу японскөй?
- Мыйла «Волга», а абу «Москвич»?
- Мыйла калбасыс бара нин конскөй?
- Мыйла анчаысь пась ме ог видз?..

Тайө моднө, а сійө не моднө...
Оз нин төр стенка-шкапө хрусталь...
Код нө вайөдіс этатчөдз? Код нө?..
Көн тэ, сьөд розя свинеча сталь?

ЯНДЫСЬЫСЬ

О, мыйта көсйөм кывлі ме ас нэмөн!
И вөвлі көсйысь вөчны меным бур.
Но сэк жө, быттьө бытшкыліс ёсь емөн:
— А пасибөсьыд, ёртө, пась он вур.
Ме — тэныд, а тэ — меным. Со и дружба.
Ми өта-мөдлысь кутлам нильзём ки.
Мөд ногыс бурсө судзөдны он куж да
Син-пельсьыд быть өд яндысьөмтө ви.

Но кодыр шеф мен кырымаліс ордер,
Мед овмөдчис патерао пи-ныв,
Эз дойд. А ме эг лысьт...
Од шефлөн — орден!
И вошис ордер.
Өнөдз нем оз кыв.
— Йөй! — горзіс нивөм повтөм гөтыр, —
Жаль лои өти төлысса удждон...
Ме өнөдз ола тайө шуштөм вөтын,
А гөтыр век на пинялө бус-бон.

ЧУЖАНИН

Ноябрын чужлөмөй,
Сибирын,
кор амбарьясө пырис
нянь.
И сэсянь олө-вылө
вирын
Обь юлөн берегвывса сиктөй —
Колывань,
көн дона батьө ачыс
мем потан вылө ваяс пу
кедрачысь...
Но коми парма сетіс меным
потан лайканөс.
Оз бөрйыны тай
ай-мамөс.
Од коми войтырлөн ме быдтас
и коми пармалөн ме лои —
пудпас.
Ас чужан муө ай-мам
локтіс бөр.

Код төдас мыйла
сылөн пөтөсаджык көр.
Да, энотасны няня Колываньёс,
көть төв шөрөдз эз тырмыв Коми

муын

нянныс.

Эм мыйкө мортлөн сьөлөмас
му дорө,—

он төд,

мый чужанінө корө...

Ог, ог,

ог кыв ме шог

и мөдлаө ме олөм абу панысь.

Украинаысь татчө воө нянныс,

Казахстанысь.

Но аддзөдлыны ассым чужанін
пыр кыскө менө пемдыштөм нин син.

Ой, озыр ар!

А луныс, луныс кутшөм мича,
шондіа...

Кузь туйө петан көлуй

тэчны понді-а,

кузь туйөс потшис

Сыктывкар,

көн пөльөн шуысьясөй

мешөкө мем пырисны

да став гөстинечьясөй сэтысь

бырисны.

Но мед.

Ме удита на аддзывны

Из сайса от,

и тэнө, Колывань,

көн нимөс меным сетіс

ыджыд вокөй —

Вань;

мед сөмын

Му шарыс эз пот,

эз сотчы му-видзыс
Сибирысь,
и Коми муысь,
и став мирысь;
ноябрын чужом власть
эз пöрысьмы,
эз чукрась,
кыз менам чужом вылын куыс...
Ме мунны дась...
Мен матыс шондi улын муыс
Курилъяссиянь да Брестöдз,
көн йöзыс олөм
выльöс
пестö;
көн Колывань,
көн лов мен сетис коми ань.



Кытөн быдмö неля ниа,
Юсö пыкö джаджъя нöрыс,—
Кыкөн пукалимö миö,
Сылыс баддя мөдлапöлыс.

Тöрыт вöли көка тулыс,
Талун гожея виддзыс ловзьö.
Малыштас кор ниа пу лыс,
Небыдлунсьыс лолыд повзьö.

Сьөлөм йөктö иган сайын,
Бытьö дзугйö шедөм колиц.
Мыйла эськө татчö кайим,
Мый нин тöрыт татчö коли:

Сбылысь баддя мөдлапöлыс?
Чöла кывзысь нёля ниа?..
Юсö пыкö джаджъя нöрыс.
Кыкөн пукалімö миö.



Ю веркöсын ворсіс чери,
Дзоридз пöвстын сбыліс чирк,
А ми тэкöд турун керим,
Пыким зорödөн ен йирк.

Бывлаыс на еджыд руа,
Пöртйын тöрытъя на рок,
Ми нин коса-кураң нуам,
Мыськам лысваöн ки-кок.

Шурс да шарс — и лэччö пöсьыд,
Синмад пырö нбылём войт.
Воам чомйö: рокыс лöс-сьыд!
Быттö ичötдырся мойд.

Сэн нин шонді сотö яра,
Сэсся öдöлитö ном...
Вонйын узыштам и бара...
Бур жö овны, кор тэ том!



Вояс лэбёны, волёны өтчүд,
Тулыс-гожөмыс волө быд во.
Шондi бөрсяыс, другө, он вөтчы,
Аслад гожөмө мөдысь он во.

Ывла оналө, вөр-ваыс томмө,
Гөгөр дзордзалө, мичаммө му.
Олан вынйөрөй мичлунсьыс ёнмө,
Быттё веж корйөн пасьтасьö пу.

Мед жө гожөмыс казтылө мортлы,
Кыдзджык лайкөдліс олөмлөн гыд...
Мед жө муслуныд дзордзалө ёртлы,
Коді тэнсьыд оз лыдды во лыд.



Юыс мөвпалө да лөнъ.
Лун шөр шондi дзевбсис.
Мөдлапөвса парма-вөнъ
Пивсө койө зепсьыс.

Локтө еджыд, локтө сьөд
Джуджыд юра кымөр:
Оз кө зэрсьыс видзыс пөд,
Сотчас чардөн-гымөн.

Тэрмасьёны повзьём йөз,
Помалёны зорөд...
Енэж несйис. Бара лөз.
Бара сьывны горөд.

ГОЖӨМ

Гожөм, гожөм, дзирдыштөмөн волан,
Номъя-лөддза сьөкыд страдна кад,
Ньылөм сора... А со ставлы колан,
Чужтысь мамлы моз жө быдөн рад.
Видз-му вылын педзө-жөдзө войтыр,
Лэбач горысь потіс парма лөнь,
Юөд кывтысь-катысь, быттьө койтын,—
Уджалөны, уджалөны скөнь.

Гожөм, гожөм,— вотөс-тшака вөр-ва,
Шойччысь йөзөн ойдысь лыа-пляж.

Гожөм, гожөм,— дзоридза, ма көра,
Тэын нинөм абу лөк ни важ.

Дойыс бурдө, сьөкыд шог кө суліс,
Чайтсьө, мөдысь юр вылө оз усь.
Сөвмө шеп.

Нянь-гожөм — сөвмөм тулыс.
Сөвмөм муслун —
Льөм пуын сыв тусь.



Алексей Смольниковысь.

И помасьтөм, и тэрыб оланногыс,
Көн тэ да ме — дзик өтик здук и эм.
Поэзияй, сыын тэнад могыс,
Мед талунъяын кыліс тшөтш и Нэм.

Көть шуда лун, көть медся сьөкыд шогыс —
Дзик ставлөн аслас олөманым здук.

Поэзияй, сыын тэнад могыс,
Мед здук мындасö Ыджыдсьыс эн юк.

Туй мортлөн синма кодзув улын кокыс,
Зэр бöрын шор и сийö сывны рад...
Поэзияй, сыын тэнад могыс,
Мед мунысьясöс аддзис локтан Кад.



Алексей Смольниковыс.

Пышйыны эськö да дзебсьыны сиктö,
Көн риа юкмöс да петшöра сад,
Кытөн кузь лунъяссö мудзöмыд сиптö,
Олöмыс лөнъ, кызди вөр пытшкын вад.

Олам да быттьö ог некодi кужöй
Тöдмасьны, сёрнитны — котөрөн пыр.
Кор нö сэк сёлöмö муслуныс чужö,
Удитас радейтны-лелькуйтны дыр.

Котөртны эськö лөнъ ю дорö пасьтöм,
Берегö гатш, ньöжмыд енэжö син...
Мусай, мусай, видз жö вай асьтö,
Эм цö Гөрд книгаын нин катшасин.



Али мукöдсьыс тэ мича,
Али мукöдсьыс тэ шань?
Али карса паськөм видзан,
Коми сиктса коми ань?

Мыйла тэкөд менам сьолөм,
Мыйла тэлань менам син?
Тувсов дзоридзөн тэ вөлөм,
Кор ми тэкөд аддзысим.



Бара тэ йылысь ме сьыла,
Дона мортөй, шондїбан.
Бара томлунөс ме кыла —
Ворсө клуб дорын баян...

Кутшөм вын нө кыскө менө
Тэ дорө со кымын во?
Мыйла радейта ме тэнө,
Өнөдз эг и гөгөрво.



Гений и злодей — несовместимы.

А. С. Пушкин

А сыын өд и лёкыс, асьсө быдөн
Век пунктө генийөн, а мөдлы потшө туй.
Зиль гижысь гижысьөс жө тупкө книга
лыдөн,
Көть лыддынысө өтик сәсь оз туй.

Сальериөс нин дорйысьө со кодкө,
Эз сийө Моцартлы пө мыччы румка яд,—
Поэтөс виө кө, то виө сөмын водка...
И сылы эскөны.
И ловъя гений рад.

АВТОЛАВКА

Катша-рака да съод чавкан
Шумын-зыкын: кар-р да кар-р!
Ягдор грездө автолавка
Вайис вузавны төвар.

Но оз мыччы некод руба,
Эзысь-ыргөнсө оз вай.
Оз и тшынась пач ни труба,
Некод вадорсянь оз кай.

— Та вылө мөй воим карысь,—
Ньобысь абу нянь ни сов?
Бөрья мортыс, Ягдор Парась,
Шойна-Ягө нуис лов.

ТЭ ВӨЛІН ШОФЁРӨН

Вася Конановлөн паметьлы

Медбөр рейсө мунін. Ми со колим,
Кытөн шонді, Мозын, парма-сад...
Коркө кыйсиг войбыд вензим-долим,
Воас-ө нө збыльысь вөзйөм кад:
Ставөн өти няньысь шөрөм вундам,
Да мед сәні ставлөн аслас пай...
А со тәнө Шойна-Ягө кундім,
Кытөн өтлаасьө ад и рай,
Кытөн чай ни вина ёрт оз мыччы,
Сьөлөм дойтө некоді оз юк...
Кытчө нө ми тэрмасям век, кытчө?
Огө кыйө олөмсьыс быд здук.

Гашкө, медводз талун колө овны
Сідз, мед эськө туй вывсьыс эн кеж,
Төдсаяслы, төдтөмъяслы ковны,
Да мед поліс тэысь, коді пеж,
Видзөдлыны лёкыс вылө лёкысь,
Бурыслы мед шуны медбур кыв...
А тэ, гашкө, өтчюд эн и окась,
Эз и вөля аддзыв тэнад сыв.

— Ме шофёр,— тэ шулін.— Со и шуда.
Олөмыс — машина: трим да трам...
Кадыс сувтіс, нинөмтор он шу да,
И оз виччысь рейсысь тэно мам.

МЕДСЯ КОМИ МОРТ

«Кывлытөм да төдтөм
Йөзлы вөлі морт...»
Ас му вылысь вөтлөм,
Матыс ёрт, ни горт.

Медводдзаөн сьыліс
Коми сьыланкыв,
Йөзлысь шөгсө кыліс,
Сылысь — йөз эз кыв.

Му вылө сэк пемыд
Усьөм вөлі вой:
Өти олан нэмыд —
Өти ыджыд дой.

Дзиръя өшинь восьтас,
Чужан мулань син.
Шогыд сьөлөм косьтас,
Муслунтө оз чинт.

Но поэтлөн шудыс —
Ас народлөн шуд,
Но поэтлөн судыс —
Став народлөн суд.

Югызд шонді петіс,
Югзис ывла выв,
Ассьыс гөлөс сетіс
Орөм сьыланкыв.

Сьыв, Иван Куратов,
Миян Ыджыд Ёрт, —
Коми муын татөн,
Медся коми морт.

ЭСКӨМ ЙЫЛЫСЬ

Ме эг эскыв Христослы,
ог эскы, —
эм көть абу
Вселеннойын ен.
Вөвлі олігас
сьөкыд и дзескыд,
но век нуөді
аскөдө вен.
Аслым колө,
а сьөлөмөй полө, —
код нө талунья кадө оз пов!
гора мөвпыс
быд пөлөсыс волө:
өти колө,
мөд, гашкө, оз ков.
Коймөд — йөзыслы бур,

нѣльѳд — аслым,
витѳд — аслым и йѳзыслы вред,
квайтѳд — ѳтилы лѣк,
бурыс
даслы...
Мый и бѳрйыны,
здукѳн оз шед.
Мѳвпыд —
сйѳ на тувъявтѳм кѳрт тув.
Со и пана ме
аскѳдѳ вен,
сѣн и тыдовтчас,
эм-абу морттуй,
эм-ѳ сьѳлѳмам пукалысь ен.

П. Ф. ШАХОВЛЫ

1.

Кыз «Войвыв кодзувлѳн» редактор,
Тѣ литература гѳрап трактор;
А кызди гижысь-драматург,
Тѣ коми драмаын Ликург.

2

Ми, гижысь войтыр, тѣысь полам:
— Оз туй! — тѣ кужан сетны дон.
О, «Мыйла олам, мыйла колам»,
Кор гижѳма «Лѳз патѳфон»?

В. Д. ЛЕКАНОВЛЫ

Олөмсө эн тэрмөдлы, эн пановт,
Олан визьсө некодлысь эн дзуг.
Олөм банын тэ — артист Леканов,
Олөм гугын —
Леканов-драматург.

«Йөлөгайн» гулавны он ыдъясь,
«Джуджыд потшөс сайсянь» некодөс он
ёр,
Нуан йөзө коми «Сиктса рытьяс»,
Көть и ачыл «Абу зимогор».

КУЗЬ ТУЙ

(Поэмавысь юкөн)

Лыа... няйт... бетон... асфальт —
Ме век восьлала, муна, муна.
Ассьым кок туйөс ог таль.
Кадыс-верстыс
историяö сунö.
Кыті муні,
ме абу сэн.
Кызди муні,
ог ставсö помнит.
Ассьым паметьöс
ме ог вен,
тöда,
мунігмоз ачым ёнми.

Көсья туйяс йылысь сьывны,
 Сьывны ветлан-муна туйёс.
 Көсья ачымөс ме кывны,
 Мыйё сьёлөм-лолөй туяс.
 Туяс сувтны тайё туяс,
 Туяс потшны визув юяс,
 Туяс туйё вөчны пуяс,—
 Уна нәмьяс вомөн уяс.
 Кузь-ө нәмыс?
 Босьтө шемөс.
 Мый нө кольөм нәмас эмыс?
 Колөм?
 Полөм?
 Сира олөм?..
 Йөла руө төлысь өшйис,
 Вешйис енәжвывса Көшыс.
 Нәмыс вешйө.
 Олөм вежсьө.
 Кывтө Мозын, кывтө Эжва...
 Ой, Россия!
 Ой, бояра!
 Войвыв муыс пессьө яра.
 Юяс — туйяс.
 Сән ушкуйяс.
 Пышйө коми, пышйө яран...
 Гырдемө Мозын, гырдемө Эжва...
 Степан Храплы ставыс пеж ва.
 Кыті мечөн,
 кыті биён,
 пөсь свинечөн,
 креста киён:
 — Князьлы эскөй,
 дикарь пиян!

Юяс — туйяс,
сиктъяс — шуйяс.
Войвыв нюръяс вомён пос
нюждө Исус Христос.

2

Ю кост вөлөкөд
юргө көлөкөл:
тінъ-тон-нъ, тінъ-тон-нъ...
Тöлыс швичкө...
Вичко, вичко...
Евангелие крепыд, сідзкө!
Русь, Россия паськав, паськав,
Мунан туйяс перна дасьтө.
Юяс вомён,
Из-поз вомён...

Сотчысь биыс
өдъя, өдъя...
Ваас келöй
өдйө, өдйө!..

Христиана ставөн — вокъяс.
Рөдвуж паськөдө оброкъяс.
Мунө Храп,
Стефан-святитель,
Енлөн-Мортлөн выль воитель.
Сотчө Пу-Ен
Храплөн туйын...
Чудьлөн морөс вылын перна,
Өні сійө раб. И вернөй.

Туйыс өтик — Мозын ю,
Эжва ю, Печора ю,
Туйсө востө Войвыв саридз —
Кывсьө князьөдз, кывсьө сарөдз:
Коми парма — озыр му.

Зиновий нима грамотей,
 Веньдинскöй нима сиктысь,
 Россійскöй сарлы гижö: «Тэ,
 Царь-батюшко, эн чиктысь,
 А кывзы подданнöйлысь кыв,
 Кыдз аслад дона пилысь,
 Кор сылы колипыс оз сыв,
 Кöть сійö сэтшöм сьылысь.
 Ми, удораса вöльнöй йöз,
 Тэн ыстам татшöм чолöм:
 Ми тöдам сöмын вот да грöз,
 Ог тöдöй ун ни олöм.
 Эм миян ыджыд манастыр,
 Дзик ставлы олö паныд.
 И тадз кө водзö лоас пыр,
 Ми тшыгла кулам тані.
 Тан көдзыд, муыс из кодь кын,
 Тэ эскы миян кывлы,
 Ог, ми ог дзевöй эбöс-вын,
 Но муыс тан оз сывлы.
 Тан козъя сьöрт,
 Тан пожöм яг,
 Тан парма — нюръяс, юяс,
 Тан чери-пöтка, вотöс-тшак,
 А тэныд — тулан куяс.
 Но ставсö мырддис манастыр,
 Оз пöтлыны манакъяс:
 Ни горш оз тыр,
 Ни зеп оз тыр.
 А ми мöй тэныд врагъяс?..»

Дыр кывзис Грозный Иоанн
 Кабала лыддысь дякöс.
 Да царскöй бедьнас джоджö кам!
 Кöть дякöс няйтöдз лякас.

И шуис царь: «Мед удорен,
Сысолеч, вымич — заряден*
И водзлань тōдіс: енмыс эм,
Но вōр-ва налōн лоō нэм.
Мед кыйсясны, кōн кыйсис пōль,
Мед вотасны тшак-вотōс,
И мед эз шу, мый кодкō гōль,—
Век мынтис менсьым вотōс.
Мед тулан-мой
Эз бокō кой
Став пармаса быд олысь,
Да юрбитис мед лун и вой
Роч сарлōн няньысь-солысь.

И сэксянь кусіс манастыр,
Крест нимыс сōмын колис...
Но вичко, вичко эз на быр,
Кōрт жыннян дыр на долис,
Кыз верōс вōжжи улын монь:
Тинь-тоннь, тинь-тоннь, тинь-тоннь...
И кыйсис-ветліс коми морт
Важ пōльяслōн чōс туйōд,
Вōр-ваыс — горт,
Му-видзыс — ёрт...
А мōд ногōн оз туй од.

НЕКОДІ ЭЗ ВИД

Пōльō вōлі коктōм,
Батьō инвалид,
Быдми ыджыд воктōг —
Некоді эз вид.

* З а р я н е н — «зырянин» кывлōн воддза форма (ав-
лōн чайтōм серти).

Пöльö вaж германскöй
Вылын воштiс кок,
Батьöлысь гражданскöй
Вылын дойдас бок.
Пöльö вöли зумыш,
Батьö рамсьыс-рам,
Некод эз нин думышт
Нöшта гым да гам.
Вокö тышö мунiс,
Бöрсö тай эз лок.
Быттьö ставлөн вунiс,
Эм-ö ичöt вок.
Ме войнаөн ворси,
Лэчти сабля-штык
Да «ур-раяс» горзи,
Кöсйöмöс эг пык.
Киöс-кокöс дойдли,
Ранитлисны юр,
Вирөн-гырдөн ойдли,—
Ставыс вöли бур.
«Бара кось кö суас,
Сийöс дорйысь эм,
Ставсö мыркас-нуас»,—
Шульвлiсны мем.
Война ме эг аддзыв,
Би улын эг вöв,
Туи — ворси-еддзи *,
Некор эг вöв шöвк.
Быдми ыджыд воктöг,
Батьö — инвалид,
Пöльö вöли коктöм,—
Некодi эз вид.

* Е д д з ы н ы — дурны-ворсны (уд).



Радио пыр кылі,
лыдди:
Панамао,
Никарагуао
зырсыо янки...
Петі каро:
была вылыс сьылө,
зонпосни сэн ислалөны даддьөн.
Зонпосни сэн ислалөны даддьөн,
море-океан сайын янки-дядьө
танкөн, танкөн...
Америка!
Тэ вунөдін Кореятө,
тэ вунөдін Вьетнамтө.
Америка!
Колумб
тэ водзын яндө,
Уолт Уитмен *
талун
тэныд
паныд.



Лөнь руын кар.
Көть лун шөр, гөгөр биа.
Оз тыдав енэж,
енсө век көть ёр.

* У. Уитмен — США-са төдчана поэт (1819—1892).

Кöрт тыра сумка
быттö нуа киама,
ог төд, кор мына сыысь,
кор,
кор морöс пытшкысь
кусас пессьысь öгыр,
кор шуа кыв,
мед сьöлöм колис куш...
Кыз руын биыс,
быттö тэнад мыгөр,
а шуны билы
омöльтор ог куж.

ВИДЗА ОЛАН, КОСЛАН!

Мозын бердын,
Пала ыбъяс улын
уна во
тэ — мичлун ай-мам мулөн.
Гашкө, сöмын
берегдорса ниа
ötнас төдö,
кодi вöли сийö,
кодi вуджис
медводдзаөн стагöс;
кодöс босьтис медводдзаөн
Шойна-Ягыс.
Со нин менам
узьöны сэн ай-мам,
коркө-й асьным,
ме коддьöмыс лаймам,
но ныв-пиян
көсийöны век төдны,

кодлы копыртчыны,
кутшөм енлы-рөдлы;
коді паніс
налысь олөм-вылөм,
кодлысь пычкис уджыс
медводдза войт ньылөм:
Курыдкатшин-ө,
Пувкоев-ө,
Ольшанов?—
Коді медводз,
сійос он нин пановт.

Ольвылө-ө,
Ёльвомө-ө,
Микөл чулькйө,
али Удор крежйө,
кытысь дурзян дулькйө,
сувтіс мортыс васө юны
да эз вермы водзлань
ловсө нуны?..

Вөлі ыбас — пөтөс няньыс,
вөлі юас — чери-пөкыс,
ягас-вөрас — тарыс-урыс.

Кытөн вермас лоны
таысь бурыс!

Пуж дырйи
эз көдзав вартөм пачыд.

Пөрысьмим,
а тә век томман ачыд.

Нималан көрт туйөн
да асфальтөн,

пыжыд кывтө-катө

пелыс-мальтөг,

мыччөдлө став светсө

телевизор,—

юкваяд тай лоис

этша кизьөр.

Кайомыд ыб былө
уна судта,
тальомыд ид-рудзөгсө
и — судтөг.

Нылыд-пиыд
олөны выль гыдөн,—
кок ув мусө
аддзө-ө көть быдөн?

Ме тшөтш көсья,
мед тэ вөлін мича,
да мед вөлін эськө
муа-виддза:
өтнас Зөрмаворыс кө
ид-рудзөгаён лоас,
нылыд-пиыд
век нин гөсти воас,
сөстөм Мозын ватө
ки тыр юас,
— Видза олан, Кослан!—
сьөлөмсянныс шуас.

УДОРА

Веж луд паськөма, вөр-ва сьөмөса,
Ю-ель сөнъяса вөлін тэ мам,
Көдза тулыса, арся прөмыса —
Менам гаж, менам вын, менам сям.

Лоин яг вылын өтка пожөма,
Парма чурк вылын кос трунда-нюр,
Шоньд төв шөра, көдзыд гожөма —
Бурдтөм дой, шутөм кыв, усьтөм юр.

Уна сёрниа өксём кывъясад
Медся удорачиыс — болгар;
Юсьём зонъясад, ышмём нывъясад —
Менам мыж, менам ки, менам ар.

Шыльыд туйяса, косъмём юяса,
Ниа-козъястём парма-вөр;
Гөльмём сиктъяса, няньтём муяса —
Оплөн гыжъясын сёлөмшөр.



И со эн лок.
И сійө лабич тыртём,
көн коркө кыкөн
пукавлімө ми.
А менсьым кокөс
быттё көмөй зыртө,
ог мун ме сэтчань,
кытөн тэнад би.
Ой, мый нө лоис?
Кужан-ө тэ шуны?
А ме ог төд.
И төдны абу мог.
Эз тырмы вынным
йөзыс водзын нуны
став эрд выв шуд
и пытшкөсса став шог.
Ми, дерт, эг төдөй:
муслун овлө гуся;
эг көсйө төдны:
овлө сылөн пом.
Но кодкө орччөн

овмөдчөма сюся:
эм варыш син
и каличавтөм вом.
И ме эг окав
тэнсьыд мавтөм партө.
и тэ он малышт
менсьым юр ни ки.
А лабич дорсьыс
буссө төлыс гартө,
көн коркө кыкөн
пукавлімө ми.



Водз тай зэв чеччөдө
гожся сөдз асылыс,
ю дорө лэччөдө,
келөдө ва шөрө.
Узьлытөм Эжваөй
кок улын сяльөдө,
лысваа веж ваөй
ун менсьым пальөдө.
Ваторсө юышта,
видз вылө котөрта,
косаөн сөтышта,
кураөн курышта.
Жуялөм шондї сэн
сиктө нин корө со...
Асылөдз шонтыся
мусуклөн морөсөн.

КӨЙДЫСА ВО

«Таво кезлө Коми пармаысь дзикөдз дугөдöма кыйны ур».

Газетысь. 1989 во

«Колö дзикөдз дугөдны кыйны тар — вөрлөн тувсов гөлөсыс вошны кутіс».

Йöз сёрниысь

Коллыыс! Коллыыс пуас! Быттö шötöма,
Козйыс быттö чачаясөн тыр.
Уркай кельöб чöv усьöма, пötöма,
Сöвмöm кольсö пу вылысь оз шыр.

— Ура во.— Тадз баитöны пöльясным.
Уна кöйдыс — прöмыса и ар.
Сöмын шогось вөралысьяс — гöльмасны:
Дугөдöма кыйны ур и тар.

Коми йöз! Эн шуöй кылöс фигаён,
Но ме рад. И шогыс тiян — бур.
Бурджык мöй, мед гижисны Гöрд книгаö:
«Коми вöрын вöвлі тар и ур»?



Максим Танкысь

Ті бөбйөдланыд асьнытö, чайтанныд кө,
пöэтыс — гөгөрвоны позьтöm тун,
а сылөн кийн олö
кывбур гижан тайна.

Од сійö сöмын сэк поэтнас овлö,
кор торйöдчылö ставсьыс,
мый вермö вөрзёдны
морт сёлёмös.

Ті сідзжö ылаланныд,
сувтöданыд кө поэтös öти радö
святöйкөд.

А вермас öмöй
мыйкö выльтор висьтавыны
некутшöм гректöм
да кын пу кодь веськыд морт?

Ті абу правösь и сэки,
кор коранныд поэтös
бур, авъя войтыр котырö,
кодьяс чукöртчöны
лöсьыда коллявыны кад.
Од сійö кө збыль поэт,
вермас и торкны
öтувъя бур гажсö.

Ті öшыбайтчанныд,
кор ошканныд либö дивитанныд сійös.
Од збыль поэтлы шуöма восьтыны збыльторъяс.
А найö оз овлыны коланаөн быд пöрйö.



Гашкö, сысысь, мый сиктса ме мортыс,
Водз зэв садьмөдö аэропортыс.
Карыс ыджыд, а этша бур ёртыс,
Гашкö, сысысь, мый сиктса ме мортыс.

Гöра-агаса том олём-вылём,
Ой, зэв ичötсянь пычкывліс нбылём.

Быдтор аддзыліс войналөн йылөм,
Гөра-агаса том олөм-вылөм.

Гашкө, сыысь, мый аслым ме эскысь,
Көч ку лызякөд вензьөмъяс пестысь,
Частө усыла ме сэтысь и эстысь,
Гашкө, сыысь, мый аслым ме эскысь.

Ме эг некодос нинөмөн удзөд.
Карысь оланін гусьөн эг судзөд,
Кытчөдз лолала, киос ог рудзөд,
Ме эг некодос нинөмөн удзөд.

Гашкө, сыысь, мый сиктса ме мортыс,
Чужан сиктам и быттьөкө гортыс,
Со тай виччысьö аэропортыс,
Дерт жө, сыысь, мый сиктса ме мортыс.

ТОМАН ЙЫЛЫСЬ

Томан ньöби,
ыджыд-ыджыд томан,—
петкөдісны гусясьысьяс дача.
Гашкө, гусясьысьлысь туйсö
тадз и поман,—
томан век жө томан,
абу чача.
А вот кодкө
морос кудйö пырис
Войвыв саридздорса
көдзыд төлөн,
кодлөнкө на
гажыс меысь бырис

няйтось гыжйөн
парсалыштны съёлём:
гижис
менö ёран
анонимка,
видзис ассьыс,
дзёбис лёк-пеж ловсö,
Олö, кöнкö,
шердын вома нимкодъ:
оз, оз тöдмав некод сылысь нимсö.
Сылөн эм, дерт,
мый вылö кö лача,
петис кö нин
тайö дзескыд туяс...
Ме выль томан улö коля дача,
прöбуйтлас мед кодкö,
ключсö сюяс!
Дача öдзöс
абу мортлөн съёлём,
дача öдзöс
кöртөн на со поман.
Морöс пытшкын
котрав кöть кöрт вöлөн...
Он, он öшöд
морöс кудлы томан.

МОРТЛӨН ВЫН

Дас квайт арös, кöть ветымын,
Мортлөн шудлуныс — бур вынын.
Морт кö дзоньвидза да вына,
Олём катчöс мунö-сынö.
Морт кö нёрпалö да жеб,
Бордтём варыш моз оз лэб.

Выныс мортлөн — кокын-юрын,
Выныс мортлөн — ягын-нюрын,
Выныс мортлөн — муын-йöрын,
Выныс мортлөн — агас-гöрын.
Выныс сәні, кытөн морт
Мортлы лоö муса ёрт.

ВОКЛЫ

Пöсь чолөм, вок!
Ме важөн тэд ог гиж.
И тэ со меным перö пом он чуткыв,
Пыр шмонитан: «То чуньöй табак виж,
То пиньтөм вомöй кывъяссö оз сукты».
А кутшөм нö тэ эськө табак пöль,
Нэм джынтö сөмын неважөн на вуджин.
Ог чайт, мый паметь тэнад сэтшөм гөль,
Мед гач кок пөв моз олөм джынтö пуджин,
Мый он и казътив дзибрөс ветки пыж,
Ми кысянь кыйим коркө первой мыкөн,
Мый он и помнит сийö первой мыж,
Кор ыджыд воклысь пицаль гуим кыкөн.
Ми, войвывсаяс, төдам и цинга,
Дай эг на вунөдöй пила-лучковка.
Тэ төдан, вокö, олөм — абу ма.
Эм Му вылын и гөр, и эм винтовка.
Став пырыс мунны вермим тэ и ме,
Ас пайсö кадыс ставсö ас ног пурис.
Но водзын мунысьыс век вöлн тэ,
А водзын мунысьлы век унджык сюрис.
Пöсь чолөм, вок!
Мед эськө бать ни мам. —
Мед эськө бать ни мам — **эз лоны мыжа.**

Мый збойыс збой,
А рамыс рам...
Мед эськө век ми вөлім öти пыжа.

ШОНДИ БЕРДЛӨМ

Тöлысь сайö пöсь Шондйыс дзевсис.
Пемдйс. Лэбач оз сыв. Никсö пон.
Көнкө, чайтöны, увтсис и лэбсис,
Воис таладор югыдлы пом.

Ылі космоссянь ылькнитіс ыркыд.
Шондй пыддйыс — енэжö розь.
Кылан: кöдзалö, кöдзалö гыркыд...
Шондй-мамлы и ворсны оз позь.

ПЫЗАНСАЙСА

В. И. Донцовлы.

Вай, другö, юыштам,—
Зэв важөн нин эг юлöй.
И горшын кос,
И юрын тöщö пу кодь.
Вай кыв-мöд шуыштам
Сы йылысь, мый эг шулöй,
Да лэптам кöш
На вöсна, кодй «мукöд».

Вай, другö, сьылыштам, —
Зэв важöн нин эг сьылöй,
Баяннад ворс,
Кöть ме и абу колиц.
Ми найöс казьтыштам
Ас мелі ай-мам кылөн,
На вöсна кöш,
Код Шойна-Ягö коли.

Вай, другö, йöктыштам, —
Зэв важöн нин эг йöктöй.
Мед лоис кост,
Ми выль ног ог мöй кужöй!
Да, другö, сьöктыштан,
Кор тэнö бöрлань йöткö...
Вай лэптам кöш,
На вöсна, коді чужö.

ÖТКА ЧОМ

Кытөн керöсыс —
юлөн верöсыс,
юлөн зять-моньыс —
из да косьт,
ласта кымöсын,
парма сьöмöсын
куткырвидзö
чом —
öдзöс восьт.
Пачыс — изья гор,
саён ризьялö,
öшинь — ки лапöсть —
öтка син,
стеныс роймöма,

йиркыс воймөма,
джоджыс-пöлатыс —
узьланін.

Стагöс-куричын,
пызан-лабичын
пуртөн прöшвиа
кыём «мич».

Код эз пыравлы,
шоньд куравлы,
кольліс нэм кежлө
ним да вич.

Быдөн висьталіс,
дойсö кисьталіс, —
войбыд лыддян көть,
кыз роман.

Керка вöчысьлөн,
горсö тэчысьлөн
өтнас ним-вичыс
абу тан.

ГИЖАСЬЫСЬ ЧЕРАНЬ

Гижны велалөма Черань
Шуда йөзкөд тшөтш
Аслас пельöсын. Мый керан, —
Югьд öні көтш.

Аддзö Черань, олам бура:
Öтилөн — «Москвич»,
Мөдлөн — дача вичко юра,
Коймөд — ачыс мич;
Тайö — гөтырыскөд олө
Гулю гозья моз;

Сійö — магазинö волö
Ньöбны коньяк доз;
Эсійöыс — чожа венö
Институтлысь курс;
Этайöлөн — выль поэма,
Гонорарыс — сюрс...

Чераньыдлөн пö öд ки жö,
Абу кык на, квайт,
Босьтö перö да и гижö,
Оз на кор сё шайт.

Гижö Черань... исполкомö
Да профкомö, да парткомö;
Гижö Черань кык газетö...
Гижö-мыркö — дуллыс петö:

«Тайö — юö; сійö — гусь;
Эсійöыс — вывтi «сюсь»;
Гулю гöтыр мöдкöд олö,
Ачыс мöд дорö жö волö;
Кодлөн дача, да-й «Москвич», —
Абу аслас ним ни вич;
Кодi гижöма поэма, —
Важөн боквытчöм юр вема...

Менам, ог кө босьт да гу,
Кöтшас цельöсын тай дзу;
Абу ни медаль, ни орден,
Ни патера вылö ордер;
Некодлы ме абу бур,
Кöть и ас ыждаö юр...

Он кө примитöй стрöг мера, —
Эз на ныжмы менам перö!
Тöдланыд на менсьым ним!
Кырымася — АНОНИМ».

Гижны велалёма Черань,
Чернилалы абу пом.
Гижөдтө он керав черөн,—
Вай комиссия, партком.

ОГ УДЖАВ, А СЕЯ

Кынёмой кө пөт,
Аддза кө бур вөт,—
Мыйла панны вен?
Нинөм сэтысь мен.

Кынёмой кө пөт,
Рөдвуж — абу рөд.
Пөтөма кө лов,
Рөдвужыд оз ков.

Кынёмой кө пөт,
Няньшом ог жө көт,—
Аддзисис кө пань,
Сюрас на и нянь.

Кынёмой кө пөт,
Ув ни чаль ог сөт,
Ог и лэпты чер,—
Нинөмтор ог кер.

Мед оз виччысь тув,
Кынёмой оз кув...
Кыдзи сийө пөт,
Ачым ме ог төд.

ТОМ ОЛӨМ

Том олөм, чардби кодь том олөм,
Тэ — ставнас олөмыслы визь.
И тэно сідзи овны колө,
Мед бөрнас некыті эз вись.

Том олөм, абу менам полөм,
Ме босьта тэысь ассым пай:
И вын, и збодерлун — мый колө.
А муслун нэм кежлө мем вай.

МОЗЫН ВЫЛЫН

Ҕи-ки кутчысьөмөн
лэччам Мозын ю дорө,
Пуксям пыжө кыкөн,
медым ваыс нуөдө.
Парма синмөн дзоргө
чужан муным — Удора,
Лунвыв төлөн шудыс
гыяс бөрся суөдө.
Резө ванас,
быттьө бабыд коркө,
пызйыштө,—
Видзө полөмлунысь Мозын
ныла-пиасө.
Коми сылангорсө
парманымлысь кывзыштам,
Быттьө өгыр,
муслун локтө
миян киясөд.

Збодер чукчи кӧнкӧ
 кӧнашыскӧд котрасьӧ,
Кӧкуль кисьтӧ ассьыс муслун
 чужан му дорӧ...
Сӧкӧл зонъяс,
 бара сӧки сӧмын
 гӧтрасьӧй,
Кор му вылын
 тӧян лоӧ
 аслад Удора.

МУЗА

Тэ йылысь-ӧ,
Мӧд йылысь-ӧ...
Гижны, гижны колӧ.
Рифма корсьны сьӧлӧм висьӧ —
Сэтшӧм здук тай волӧ.

Со нин бара
Ӧшинь тасӧ
Синсӧ домис югьд.
— Кисьт вай ещӧ чая васӧ,
Радиосӧ дугӧд.

Тэ эн дӧзмы.
Тэ эн шогав...
Муса мем тэ, муса.
Но тэ прӧстит, эг кӧ окав,—
Менӧ кутӧ муза.

ШУД

Кор ывла вылын өвтө майон,
Му-видзыс дзоридзьясөн тыр,
Сэк кодкө быттьö муслун вайö,
И шудлун морöсысь оз быр.

Сэк быттьö век дас öкмыс во на
Свет вылас ола сьылигсор...
Ме шуда, радейта кор ёна,
Но кык пöв — радейтöны кор.



Лыдтöм дзоридзөн ойдöма видз выв,
Польдöм турунысь пычкысьö сök.
Мыйла видзсö оз мич вылö видзны,
Отнас кодлыкö порасьö кök.

Да и ме, тані вöлі кö водзджык,
Тöдса нывлы, дерт, вöчи букет,
Пötöм мазі моз кытчöдз эг коддзы,
Эськö дзоридзьяс пövстысь эг пет.

Но ме тракторөн ытшкыны петі
Öшкамöшкаөн шебрасьöм видз.
Мед, эг козьнав кö нывлы букетсö,
Чайта, окалас талун и сідз.

СЬӨЛӨМӨЙ ТАНИ

Эз ышөд челядьдырсянь менө море,
Тельняшка вылө завидысь эг пот.
Ме сьөлөмөйлысь сәні овны кори,
Көн море кодь жө вөр-ваыслөн от.

Көть төдса Белөй море, төдса Чөрнөй,
Көть качайтліс скөр Балтикалөн гы,
Ас Коми пармакөд ме некор эг вөв торйөн,
Быд штормысь кылі вөрлысь шувгөм шы.

Өд вөрысь ме, дзик пищаль кузьта зонка,
Лаз ноппын мамлы вайлі первой тар,
Тан аслам другкөд, муса Лыско понкөд,
Вөр азбукаөн төдмаси быд ар.

Ас киён шыд ме первой пуи тани,
Тан киссис менам первой лыжи кыс...
Кызд юнга морейн, ме ягын олөм пани,
И мем тан небыд весиг ем кодь лыс.

МИ ШУДАӨСЬ

Да, ми шудаөсь.
Сәтшөм шудаөсь,
весиг шуднымлысь от төдөй дон.
Дзик Парижын моз
вежөны модаяс
Коми пармаын ныв да зон.
Зэв-ө важөн на
водліс пажынтөг,

новліс дөмаса дөрөм-гач,
талун тшана зэв
мунө шляпаа —
бригадир сійө либө врач.
Ныв-зон уджалөны,
сосъяс пуджөмны, —
өд и уджас эм ашөр шуд.
Вөчам дивөяс,
пырам йи-ваас,
лэбзям шонділань — видлы, кут.
Да! Ми шудаөсь,
сэтшөм шудаөсь,
сыысь шудаджык мөд оз ов.
Аттьө ай-мамлы,
аттьө налы,
коді шуд вөсна пуктіс лов.

МЕДБУР СТИХ

Зэр киссьө,
гымалө,
му йөктө.
Бын
менө эновтөма дзик.
А сьөлөм
кевмысьөмөн тшөктө
мен гижны ассым
медбур стих.

Водз асыв.
Муна Кослан кузя.
Рифмуйтчө юрын
кер да чер...

Сёр чеччан —
олём джынтö узян,
он аддзыв
шонді петан сер...
Выль керка лыбöма,
выль карта:
выль паськөм пасьталö
важ сикт.
Ме быттьö тшöтш сэн
көрт тув варта, —
век гига
ассьым медбур стих.

Кор муна
гөрөм ыбъяс вывті,
кыв йылö крукасьö с о в х о з,
а ыбъяс сайсянь
тутсөм кывтö
да пырö стихö
п а р о в о з...
Ме көсья
чужан муос сывны,
көн йöзыс
паччөр йирк оз пык.
И меным
медся любö кывны
выль олём шы,
кыз медбур стих.

ПӨРТМАСЬЫСЬ ВОЙВЫВ

Эн кө аддзыв тэ пөртмасьысь Войвыв,
Менсьым Комиос видзöдлы лок.

Эн кө аддзыв, кыз дозмөр тан койтө,
Ме тэд петкөдла, лунвывса вок.

Эн кө кывлы, кыз лыйсьө тан пашляк,
Кызди поткөдлө көдзыдыс пу,
Ветлам пармаө ми патронташтөг,
Тшөтш и петкөдла руа он гу.

Өддзөд кокъястө, туланөс ордъяв,
Көсьян, ниа пу йылөдзыс кай...
Пестам коз улө вой кежлө поддя,
Юам кружкаөн пакула-тшай.

А вой енэжын пөртмасьө востым:
Быттьө шондисө жуглө кыз йи,
И сэн, потласьөм йиясыс костын,
Шондi торъясыс койоны би.

Войбыд югөрсө кутасны койны,
Сөмын ньөти оз шонтыны бок...
Эн на аддзыв кө пөртмасьыс Войвыв,
Көми му, другө, видзөдлы лок.

НӨШТА ӨТИ ТУЛЫС

Сальмөм өшинь гурйив восьтис Анна:
Шызьөм шондi чеччис өшинь тасысь,—
Быттьө том дырйиыс Петрованыс,
Бандзибьяссө окыштити виль асыв.

— Чолөм, асыв! Видза, шондiбанөй!
Мелi мам моз ме дөрө тэ волан.

Дзоридз розійон ловзьö чужöмбанöй,
Кор тэ мекöд орчöн тадзи олан.

Öшинь дорын пукавны эм право:
Пöжась, няньöй, шыдöй, чайöй, пактав...
Ыбъяс вылын, кызди век, и таво,
Муракылö оз на öти трактор.

Кывзö Анна, быттьö сёрни паніс,
Быттьö кылö верöсыслысь гөлös,—
Коркö важöн сылөн Петрованыс
Тайö кадö доддявліс көрт вёлös.

Кörтысь ёнджык аслас вöвлі лысьöм,
Бокъяссö эз пöж сэк шоныд паччөр.
Вояс, вояс вайöмаöсь висьöм,
Сімöм вояс волöмаöсь татчö.

Гөрліс-көдзліс сэки ки-кок помысь,
Чарлаөн на вундіс рудзөг-идсö,
Медбөръя нянь торсö аслас вомысь
Ныв-пиыслы торйөдліс: төд витсö!

Öні ставөн воöмаöсь мортөдз,
Ставлөн аслас шудлуныс и шогыс,
Но эз воны некод аслас гортөдз,
Некоді оз овны ай-мам ногыс.

Некодös ни ошкыны, ни видны,
Некодысь и векни туйысь кежны.
Важөн лои тыртём карта-гидныс,
Некодкөд и кывтö лои вежны...

Самöвар сэн пузис, ичмонь мича,
Стенсянь дзоргысь салдат водзын потö.
Шуис Анна: «Петрованöй, видза!»
— Видза, Анна!— шуис важмём фотö.

УТКА КЫЙӨМ

Он көсйы нин кыйсьыны мунны:
То зэрö, то шляча, то лым.
Но бара (со кымынöd лун нин)
Двустволкаыд öгыр кодь пым.

А утка пыр лэбö и лэбö,
То öти, то дас, то и сё.
Но лэбысьöс сынöдыс дзебö:
Тэ лыян, а дрöбйыс оз во.

Шог доймытöдз юр тэнад чатөр,
А ки-кокын гегдö быд чунь,
Но сюзь моз тэ пукалан татөн,
Дзик войбыдөн синтö он кунь.

А утка пыр лэбö и лэбö,
То öти, то дас, то и сё.
Тэ надейтчан: öни нин шедö.
Но бара на утка он сёй.

Сьöd сукарөн нурьясян вежон,
Консерв вылын прöйдитас мöd.
Тэ пицальтö ёртыдкöd вежан,
А мыйла тэ вежан, он тöd.

Сэн гöтыр нин паськөмтö дзебö,
Тэ клянйчитан: «Всё, сэсся всё...»
А утка пыр лэбö и лэбö,
То öти, то дас, то и сё.



Кодкө нөрөвтис поноль...
Быть өд быдмы да ов.
Эз вөв мукөдысь омоль,
Өні мортлы оз ков.

Быдмө чукля да лолөд,
Но и мегыр он вөч...
Оз-ө йөз пөвстын лолы
Татшөм дивөыс стөч?



Тшөкыда мем шуоны:
Тэ пө вывті крут,
Пөртйын ва моз пуан и
Сьөлөмтө он кут.

Да, ме абу лятіысь,
Сьөлөм менам пөсь.
И ме абу на пивысь,
Олөмас код гөсть.

Веськыд туйысь кежан кө,
Вомө ва ог босьт,
Другтө врагөн вежан кө,
Пана ме и кось.

И мед век көть шуоны,
Вывті пө ме крут.
Кытчөдз верма, пуа па,
Сьөлөмөс ог кут.

МЕДВОДДЗА ЛЫМ

Эзысь кодзулөн ки вылө водө
Челядь дырйи моз медводдза лым.
Тадз и арлыдöй: содö и содö.
Сöмын ки пыдöс век тай на пым.

Со и вом дорöс сотыштис, быттьö
Волис медводдза муса том ныв...
Кодöс окалан öнi ме пыдди,
Кодлы сьылан тэ нор сьыланкыв?

Кöдзыд сынöдыс спиртысь на чорыд,
Öтчыл апыштан — содöма вын.
Öшинь вылын со кодлөнкö дзоридз,
А ме кок улын муыс нин кын.

Кöнкö томлунöй ышловзис ылын,
Вөрзис сьөлöмöй, кылö — гым-гым!
Овны кöсйи ме эськö му вылын
Нэмöс томөн, кыз медводдза лым.



Ме тэнö виччысьли,
Кыз колип асья шонди.
Тэ менö колльöдлин,
Кыз ичöt нылöс бать.
А гусьөн, полигтыр
Кор окавлыны пондин,
Тэ менö шонтылин,
Кыз сэтөр тусьöс бадь.

Ме тэнö радейті,
Тэ быттьökö тай тожö.
Тадз мөдлы шудыс быттьökö
Оз усь.
Но мунін тэ...
Тадз пышійö арысь гожөм,
И пасьтөм чаллын
Кынмө сэтөр тусь.



Тэнад киясыд ньөжмыдөсь талун,
Тэнад коқъясын быттьökö дой.
Сідзи мөдөдчин юкмөсө вала,
Быттьö абу и узьöмыд вой.

Ме эг дойд тэнö синмөн ни кылөн.
Мыйла чужөмад дзевсьöма шог?
Али нывбаба сьөлөмнад кылін:
Мыйкө кытікө абу тэ ног?

Өти лун-войөн сідзи тэ мудзин —
Быттьö гөр дорысь разялөм вөв...
Ме өд коз улын, мусаөй, узи,
Лыско кындзи сэн некод эз вөв.



Нывбабалөн мичлуныс —
абу сөмын чужо́мыс,
абу сөмын морёсыс,
абу сөмын кос.
Нывбабалөн мичлуныс —
сөмын өтчыд кужо́мыс
сьөлөмсянь да сьөлөмөдз
вочны крепыц пос.



«Ме тэнö радейта» —
Зэв кокни куим кыв.
Но кутшөм сьөкыд
 өтчыд найөс шуны,
Кор тэныд мусмис первойсыс
 том ныв,
Кор вирыд кутис, пөртйын
 сир моз, пуны.

Ме тэнö радейта.
И сы вöсна ог лысьт,
Вир-ййөс сотысь мортöй,
 өтчыд шуны.

Век меным кажитчö:
Сэк муслун лоö кысь,
Кор сьөлөм пытшкын
 нинөм лоö нуны.

«Ме тэнö радейта» —
Зэв кокни куим кыв.
Но кымын во

Ог лысьт ме сійӧс шуны.
И сысь ачым
Век на быттӧ том,
Мый ассьым тайна
Ог сет аслым гуны.



Кор тәнсьыд китӧ босьта аслам киӧ,
Сэк быттӧ вуджас сӧнысь сӧнӧ вир.
Став лолӧй быттӧ пыралас сэк биӧ,
Син водзын вежсьӧ ставнас олан мир.
Кыз быттӧ асыв сувтӧ Коми муӧ,
Быд баддын дзольгӧ-сьылӧ колипкай.
Став лӧксӧ быттӧ дзебас кодкӧ гуӧ,
И весиг кымӧр аддзӧ дзебсян сай.
Кор тәнсьыд китӧ босьта аслам киӧ,
Дворецӧн кажитчылӧ миян олан чом.
Пӧсь кийд тэнад шог и мудзлун виӧ,
И тэ сэк том, и ачым важ кодь том.



Помнитан, кызд виньдіс кӧкыд,
Кор ме вояс лыдди?
Вӧлі торйӧдчыны сьӧкыд —
Ставсӧ пункті пыдди.
Весиг быттӧ сувтліс сьӧлӧм
Тэнад шоньд сывйын.

Мортлөн шудлуныс тай, вөлөм,
Абу көклөн кывйын.



Большоны йөзыс зэв уна,
Ме пө зэв радейтчысь морт:
Өтикөд дружита лунын,
Рыт кежлө вежсьөма ёрт.

Олөмыс водзө пыр мунө,
Вомъясысь сёрни оз быр.
Тодсаыс менам, дерт, уна —
Мусаыс өти тай пыр.



Муса аньёс өтчыд дойді —
Вомсьым петіс чорыд кыв.
Менө сывъяліс дзик войбыд
Шоныдінын көдзыд сыв.

Дойдны аньясөс зэв кокни,
Оз тай ков ни чер, ни пурт.
Сөмын аньыд оз на-й ойкнит,
Оз кө дзикөдз горшыс курд.

Бара вурас орөм кизьтө,
Утюжитас гынмөм гач,


Самоварысь чай тэн кисьтö,
Бытьö нинöм эз вöв нач.

И, кöть сьölöм сылөн бöрдö,
Чужöм вылас абу скөр.
Бытьö кышöмаöсь кöртөн
Муса анылысь сьölöм шөр.



Яла яг вылын вотам ми чöd,
Яла яг вылын чödйыс зэв юмов.
Вомад тусь быдса сöмын и чöвт,
Кыдзи син-пельыд ойдöма нюмөн.
Менам дозмуқöй чödйөн оз тыр,
Челядьдырся моз шыблася-дура.
Яла яг вылысь чödйыс оз быр,
Кöть тэ зырийөн, кöть нарманён курав.
Вотны чöd ме эг велав, ог куж:
Лöштыс дозмуқын чödсьыс на уна...
Яла яг вылö усьöма пуж,
А ме вотчыны мусакöд муна.

ПОЗНАРС





ЭЖВАКАР

Поэма

1

Ме олөм лөкөдны ог куж,
Ог вермы шуны сійөс гөльөн.
Но мортыс сы вылө оз чуж,
Мед сійө кулис ёрөм пөльөн.

И шуштөммас кө гажа яг
Да дзикөдз раммас визув юыс,
А парма пыдди кольö чаг,—
Оз ков мем татшөм озыр муыс.

Ме төда, шондїөдз он судз,
Но пармаөй мед вывлань кайис,
Мед шондї мозыс жө эз мудз
Да сідз жө радлун йөзлы вайис

2

Кодлы — море,
Кодлы — степь,
Меным — парма-вөрөй.
Кодлы вөрыс — тыра зеп,
Меным — сьөлөмшөрөй.

Сьылö кöлеса: руй-руй...
Но оз узьсьы тарыт.
Менö кыскö уклад туй
Эжва дорса карö.

Öшинь сайын парма гор,
Верötьяс, сёнъяс...
Гöгыльтчöны — пом ни дор —
Вөр тыра вагонъяс.
— Кытчö тэрмасынныд тi
Войвыв Коми мусянь?
— Муыс, кытчö мунам ми,
Уна нимөн шусьö:
Волга виччысьö и Дон,
Няня Украина,
Дай Болгарияын, тон,
Коми вöрыд ина.

Вөрлөн инан туйыс сюрс,
Коланлуныс помтöм.
Мунö поезд дзирс да дзурс,
Менсьым сьöлöм ёнтö.

Кайли вөрö, сулис мөг
Тыртны чуман тшакöн,
Мыр да пөрöм, лөп да ёг —
Вöвлöм Ыджыд Ягын...

Восьса синма и сусед,
Удораса зонка, —
Сёрни гөрöдным оз шед,
Бытьö абу помка.

Туйыс шылъыд, туйыс кузь,
Пöттöдзыд кöть вöтась...
— Мыйла, бур пиö, он узь?
— Унмöй коркö пöтас,
Нормöм сьöлөмöй оз пöt,

Парма вöсна потö:
Кутшöм пу ог пилит-сöt,
Джынсö бицур сотö.
Быдмис пожöм, быттьö сись,
Гулыд яла ягын,—
Куйлö штабелясын сись,
Тырö пучей-гагөн.
Керйөн тырö ю и ёль,
Тшыкөдö сөдз васö,
Бырö юысь ком и лёль,
Вошас öти часö.
Дой тыр вöрыслы быд кер,
Лыска пу, кöть коръя...
Гашкö, лоа инженер,
Парма-мамöс доръя.

- Мөдөдiсны мам да ай?
- Бать Берлинын усис...
- Мый нö нимыд?
- Микулай.
- Бур туй!— сöмын шусис.

3

- Эй, сэн кодi меысь водз
Эжвакарсö панiс?
- Эм татарин, эм и роч,
«Химикъяс» ми танi.
Кöть и мыжа йöз, но ас,
Абу кöртысь-пуысь,
Ловъя вира сөкөлъяс
Асланым жö муысь.
- Видзөдлам, тэ кутшöм йөг
Коми муö чеччин,
Кутчысь киям, пöръясытөг
Зэлөдчы, эн сетчы.
Песовтчисны кык ён ки:
Кодi кодсö венö?

Жмитö комсомоллөн пи,

Жмитö-й «химик»...

— Энö!..

Тырмас, кык козёл!—

Штукатур Галина

Взорвитчис сэн, быттö тол,

Торйöдiс жеб кинас.

— Вермасымö уджын вай,

Вынтö сэтчö видзöй...

— Ме — Тарас.

— Ме — Микулай.

— Нылыс сэт-тшöм мича...

Кыв да мöд, и ставөн — ёрт,

Быттö важся тöдса.

А Тараслөн быдмис борд,

Öйис сьöлөм — лөдсав...

4

Став бурыс стройка вылын — удж.

Эн сёрмы-нюжмась, состö пудж,

Машина дасьты, трактор, кран,

Эн виччысь тшöктöм, уджтö пан.

— Ур-ра! — мед кылö. — Майна! Вира! —

Став стройка виракылö вирад.

Стрöг генерал кодь жö прораб,

Тэ сьлөн көсйöмысь эн ляб:

Öд сiдзи вöч, көть тадзи вöч,

Тэ вöчан сiдз, кыз колö стöч,

Кызд пуктöма кирпич и кер

Бумага вылö инженер.

Бумага-калька — көдзыд вир,

Но сэтчö төрöма став мир...

Бумага — колана төвар,

И сийöс вöчас Эжвакар.

А мастер тэ-ө, бригадир,
Тан, стройка вылын, — өти чир,
Көн йөзыс, быттьө кодзувкот,
Он судзөд синмөн уджлысь от...
Со лэптис кодкө мудзём юр
Да гора шуис: «Пе-ре-кур!»

— Гей, Микола!

— Мый, Тарас?

— Чужис пи...

— Мед чужас дас.

— Гарно шуан. Эм на кад,

Эштөдам со выль детсад...

Өні медводзыслы вай

ним тэ вай.

— Пукты менсьым — Микулай.

— Сідзкө, лоө бур вежай!

Гөгөр серам, гөгөр шум,

Кумөс кутлө кум.

— Рытнас лоө самөвар,

Гөсти лок став Эжвакар!..

Перекур, перекур...

Колан дырйи сійө бур:

Пыді лолышт, личөд сөнтө,

Пөрччыв коксыд дзескыд көмтө,

Песышт кыв,

Колөк, сьыв,

Колөк, синйы ывла выв,

Ошкышт ёрттө,

Казьтышт горттө, —

Со и бара содіс морттуй.

Но и овлө перекурыд

Сирва-дьөгөдысь на курыд...

— Көн кирпич?

— А көні ляти?..

Кодкө повзьөдлө нин матьөн...

- Көн директор?
- Көн парторг?
- Абу стройка тані, морг...
- Сэн машина воис гур-р,—
- Помасис кузь перекур.

5

- Ывла вылын югыд май,
 Дружнөй котыр юö чай:
 Коми, роч, чуваш, башкир
 Вьль морт вöсна вöчис пир.
 — Багатыр вöсна, Микола!
 — Мамыс вöсна тожö колö...
 — Мича нывъяс, ошйысямö,—
 Нöнита коді лоö мамөн?
 — Тэ эськө и варов зон,
 Ачыд гөтрасян-ö он?..
 Шмонь да серам,
 Шум да гаж.
 Сэн и гудöк кодкө дзаяж.
 — Йöктöй, нывъяс, йöктöй, зонъяс,
 Этна небзисны законъяс:
 Вöлін «химик», лоин «раб»,
 Аски — инженер-прораб...
 «Кекöнач, кекöнач,
 Йöктö керка, йöктö пач...»
 Гудөкасьысь коркө-й мудзис,
 Кыыс öдва көшлань судзис:
 — Галюк, дона ичмонь-ныл,
 Кисьтышт меным, мылкыдвыл,
 Висьтав, зарнийöй, эн пол,
 Пиыд коми-ö, хохол?
 Мамлөн дась нин кылыс воча:
 — Мед Миколка лоас рочөн.
 — Рочөн?!
 — Рочьяс вöсна тост!

— Тост. А сэсея, ёртъяс, кост.
Горёдлам вай бурджык сыслан
Ставлы гөгөрвоан кылөн.
— Ноко, буръяс, щökötуръяс,
Вылө гөлөс, вылө юръяс!
«Ехали казаки из Дону до дому,
Пидманули Галю, забрали собою...»
Гөрдөдөма Галя,
Бандзибъясые дон,
Синкымъясые — каля,
Өмидз — нюмысь вом.
А Микола-Микулай
Люлю-потанын бай-бай.
Тиньгис-тоньгис вой шөр час.
Разөдчис рабочөй класс.
Комсомолец тэ, көть «химик»,
Шөйчөм вылө ставлы лимит...

6

А тап партком. Парткомын йөз.
Партком — став уджлөн штабыс.
Парткомын куритөма-лөз,
А венлы помыс абу.
Зэв яра дорйө асьсө зон:
— Пөдрадөн став бригада!
Парторглөн нюмөн тырө вом:
— Бур сёрниые — ас кадө!
Директор тыртө блокнот лист
Да дзевсьө өчки саяс,
Тап сийө прөстө коммунист,
И гөгөрвоө тайөс.
А сідзсө мортыс крут дай сюсь,
Мөд кучикөн оз эжсьы,
Өд критикаысь юр оз усь,
Ним-вичыд оз жө вежсьы.
Парторг нин кутлө зонлысь ки...

Ак, зонмыс кутшом тодса!
Купеын тодмасимө ми,
А öнi быттьö мөд со:
И нырыс вылынджык, и тшап,
И синмыс дзоргö ёся.
Ме сийöс сой пöлöдыс тшап,
Он кöсйы тöдны, меся?
— Кыдз олан-вылан, том земляк,
А гашкö, чинöдз воин?
— Рабочöй чинöс эг на ляк,—
Ме коммунистөн лои.

А орчöн нюмъялö парторг,
Парторглөн уджыс уна.
Мед туйсö олöмлысь эн торк,
Тэ быдмы лунысь лунö.
Мед вöлин томъяслы тэ том,
А пöрысьяслы — пöрысь,
Туй ассьыд йöз дорö эн пом,
Кыдз муыс дорö гöрысь.
Парторглы быдöнöдз эм мог,
Парторгыд ставсö тöдö:
И юкны гаж, и юкны шог
Мед ставыскöд и мөдö.
Оз тэч ас киясөн кирпич,
Оз веськöдлы и кранён,
Но öтик сөн оз овлы лич,
Йöз могөн тыр да планён.
План — ставлөн олöм, план — закон,
Сы нимён чеччы-й вод тэ,
Сет целлюлоза и картон,
Бумага — планысь содтöд.

7

Оз ачыс вөр-ва лыдды во лыд.
А бергöдчан, да сибдö лолыд:

Көн пуксис Эква бердын сикт,
Сэн быдмис кар, том юсь кодь дзик,
Крут керос вывсянь юо чолө
Да ворсө борднас асья төлөн.
Код төдліс, көні овліс коми.
А өні коми ставлы: «Со ми!»
Ки мыччө газөн «Войвыв кыа»,
Став му индустриялөн шыа:
Усинск, Инта и Воркута,
Вуктыл и Жешарт, и Ухта —
Кысь из шом, нефть, фанера, мебель
Россия пасьта мунө-лэбө;
Көн Олимпийскöй чемпионъяс —
Печора бердса нывъяс-зонъяс;
Көн и Аврамов, и Юшков,
И Рем Ермолин, —
Ме чайта, некодлы оз ков
На йылысь дольөм.
О, Коми му!
Тэ вежин чужөмбантө,
Москва нин сьылө «Шондібантө».
И тэнад мыла кыла горыд
Став мирсө шызьөдөма, морыд:
Лөз саридзсайса дзор ученöй
Выль кыв пө велөдөма, коми.
А со нин гөсти финн и швед,
И англичанин локтө. Мед.
Мед волө гөсти көть став мирыс, —
Оз дзурт страналөн өдзөс дзырыс.
Мед төдө миян дзор Му шар:
Эм Коми муын Эжвакар.

8

Сэк сөмын сьөлөм менам нормө,
Кор Коми муын ме ог ов.
О, парма, мусаммин тэ кор нө,

Кор меным пöльыштін пöсь лов?
Ме кöсья, век мед вöлін шуда.
Ме кула. Мед жö тэ эн кув.
Бур ань моз йöзöс вердан-удан,
Век чöскыд тэнад чöд и пув.
Мед югъяласны лысва войтъяс
Да ловзьöдасны кыдз пу гар,
Мед гажъяласны дозмөр койтъяс,
Пыр кутас сывны сьöла-тар.
И тэ индустриялөн сывйын
Пыр лоан олөм сетысь мам,
Быд козйысь, пожöмысь и ньывйысь
Мед аддзин мортөн пуктөм сям.
Тэ пытшкын выныс Коми мулөн,
Тэ — коми чужöмбанлөн мич,
Тэ соддзын миян озырлуныс,
Тэ — Коми мулөн ним и вич.
И югзин кö тэ югыд биөн,
Да тэнсьыд нёнялöны вөр,—
Мед вöлі Эжвакар бур пиён:
Мам — пилы, пиыс — мамлы бөр.

ТУЙ ДОРЫН НИА

Поэма

ВОДЗКЫВ

Паськыд юлань морөс
Мыччө ыджыд сикт.
Сарай содладорас
Ыбыс лэччө дзик.
Мөдлапöлын егыр,
Ыбö тувччө сьöрт,
Юлөн эзысь мегыр
Сиктсö кытшовтö.
Тайö сиктас менам
Олö-вылö рөд.
Öтвыв дышлун венам,
Вензям сюсьлункөд...
Йöзлөн моз жö керка
Менам абу важ,
Төдлі лэчыд черкөд
Сэні шог и гаж.
Керка-карта дорті
Пышйö паськыд туй,
Мир туй помтөм-дортөм,
Кыдзи мойд «Руй-Руй».
Туй дор йöрын ниа
Шевкнитчöма, ён,
Став рөдвужлөн миян
Сылы абу дон.
Арын зарни кисьтö,
Тулыс воö — веж,
Гыма зэрыс мыськö
Сылысь бархат эж.
Гожся öдъя оньыс

Лыс улас оз пöж,
Тöвбыд пыста-жоньыс
Шонтö сэн ныр-бöж.
Кор ме светö петöм,
Нывъяс бöрын пи,
Пулы олөм сетөм
Менам батылөн ки.
Мед пö туас-быдмас,
Овмодас куш луд,
Ветлысь-мунысьыд на
Видзöдлас и — шуд.
Парма шöрысь вайöм,
Коліс көть, эз ков,
Ниа вывлань кайö,
Быттьö ловъя лов.
Ниа улысь петö
Гажа дурзян-ёль,
Сылы вынсö сетö
Ыбгорувса оль.
Ёлыс тулö-ямлö,
Сэтшöм сылөн выть,
Кыз и мортлөн сямлы
Вежсьывлыны быть.
Шоньыд, — пöттöдз ызгы,
Юктав, мыськав, верд,
Съыв и пинясь-бызгы,
Ойдлы паськыд эрд.
Кöдзыд тöлыс босьтас
Бын и варовлун,
Жарыс тожö косьтас...
А тэ визувт-мун.
Тэрыба зэв олам,
Котöртам, — он кут,
Бергöдчывны полам,
Мед көть эн жö тут.
Шувгö ниа пуыс,
Дзуртö чаль и вуж,

Вөрзбылө став муыс,—
Норасьны оз куж.
А ме ёлысь курта
Соддзö кöдзыд ва,
Кывза пулысь дзуртöм
Олөм-вылөма.
Ниа пулөн ёлькөд
Мойдлы абу пом...
Олөмтö кöть солькөд,
Мöдысь он ло том.

I

Öти парта сайын
пукалім кык зон,
Классысь классö кайим,
кыкөн — медся ён.
Веня сюсь да варов,
ме, кöть рам да лөнъ,
Ёртасим,— кöть гаровт
кыклы öти вөнъ.
Öшинювса ниа,
ниаувса ёль
Вөліны век миян,
мыйтөг лун эз коль.
Ёльö «парус» лэдзам,
газет пыж-караб,
Ниа вывсянь видзам
«вөрөгъясысь» «штаб»...
Ворсөмъясысь дөнзям,
огö олөй чöv,
Тшын-бус зыксям-вензям,—
тöдтөмтор эз вöv:
Кыз-ö пушка вомыс;
Быдөн-ö герой;
Эм-ö енэж помыс;
Кузь-ö Марсын вой;

Сьёлöмыс-ö, лолыс
 видзö мортлысь нэм;
 Сиктса комсомолыс —
 сунис али ем?..
 Көть ми эг нин лөвтöй,
 эм-ö, абу ен,
 Эз век öти мөвцöн
 помасьлы быд вен.
 Помнита: экзамен
 сдайталім на ми,
 Эндылөм вен панім,
 вомысь чеччö би.
 «Морт олöмыд помтöм, —
 доръя ассьым кыв, —
 Батьöс пиыс шонтö,
 мамын олö ныв.
 Пиыс нуас водзö
 батьлысь олан визь,
 Кыдзи арся дзодзöг
 кельöбсö оз кисьт».

Веня шуö: «Олöм —
 ачыд аслыд пом.
 Югыд светас волөм —
 пачын ырзян шом.
 Олан визьыс, өртöй,
 Муыс кодъ жö важ:
 Ань мед вöлі орччөн,
 кынöмпöt да гаж».

Öти юркытш кыим
 öти нывлы сэк,
 Öти кывбур сиим
 Августалы век.
 Августа-«дозорлы»
 вöлім ми «кык вок».

Чайтім, оз нин орлы
 куимлөн венок.

Вөв вылө ме сөлі, —
Вомам папирос.
Вөлөй зөм-зөм чеччө,
Сөмын гөнит-куль.
Вежөктөмла лэччө
Ёртъяс вомысь дуль.
Пөляся лөз тшынөн,
Вильшася, ог дзеб...
Но ме верстьö вынөн,
Вөлөмкө на жеб.
Көть нин ачым перйи
Аслым кынөмпөт,
Эг на ачым бөрйи
Мунап туйлы өд.
Кодкө ёртъяс пөвстысь
Лэчтис мелань гыж:
Уна вөлі өзтысь,
Өти вылын мыж.
Өнөдз лолын олө
Тайö шуштөм лун...

III

Класскөд
Комсомолө
Веня тшөтш эз мун.
Мыччис
Ставлы
«Козин»:
— Комсомол оз ков!
Сытөг овны позьö,
Тэ кө ловъя лов...

Батыс район пасьта нималана морт.
Сетис йөзлы асьсө Кодзувкотов ёрт.
Сьökыд война чөжыс кутис дзонь район,
Выговоръяс чөжис да инфарктъяс тон.

Тылын тожө колө чорыд кабыр,— пыдз!
Баба котыр олө фронт вылын жө кыз.
Пыдзис пөсь и синва, көдзис нянь и страк,
Эскөмыс эз чинлы, удж эз вөвлы брак,
Дорис жө Победа, Мирлы тэчис туй.
Кызди тайө шедө, вунөдны оз туй.
Партиялөн гөлөс,
Комсомоллөн кыв,—
Сиктын
СИЙӨ вөлі.
Пиыс мөй эз кыв?
Кодөс быдтис ачыс?
Лэдзис кутшөм вуж?

«Көні вөжжи-врачыс?..

Петкөдла на пуж...»

Сөрмис.

Гезъя кыис усис увлань бөр,—

Лабич вомөн пиыс өні эз нин төр.

Вөлөмкө, рөд пасыс өні ассыс ён...

Сэки гезсө аслыс сьыліас...

И пом.

Содис Шойна-Ягө пөшта өти гу...

Лоас аслас кадө ставлөн сәні дзу.

Но

Нелямын арөс — морт олөмын джын.

Но

Нелямын арөс,

А со мортыс кын.

Кышөмаөсь гөрдөн ыджыд мортлысь горт.

Ставнас сиктыс бөрдө,—

Кулөма ас морт.

Юрсиясын вореө лым чиръяса төв.

Сьөкыд татшөмторсө гөгөрвоны.

Чөв.

Грымөбтис салютөн пищальяса йөз...

Веня мамсө кутө.

Курччөм парйыс лөз.

Шуис:

«Со и бырис.

А тэ: баты да пи...

Кисьмөм тусьсө шырис.

А мый аддзам ми?

Юрлөс вылысь орден?..

Сийөн тэ он пөт.

Сийөн ме ог бордьясь, кольөм өтка рөд...»

Веня синсө чышкө,

Сьөлөмыс оз бөрд.

Меным быттё мышкө сюйисны пөсь көрт:

Баты...

Да баты жө кулис!

А тэ быттё йи...

Ай-мам меным шулис: «Батын оло пи...»

Меным баты өлі, кыдзи пөчлы — ен.

Батылөн быдтор өлі, Му вылас мый эм:

Гөрд звездаа шапка,

Галифеа гач,—

Вылө лэпты шапка да и гөнит скач.

Збой Чапайкөд радын ну беляккөд кось,

Нөйт фашистөс-гадөс да Берлинсө босьт...

Но...

Но оз нин шонтыв менө батылөн сыв,

Сиктын ни ас гортын горыс оз нин кыв.

Усьөма Рейхстагын

Роталөн парторг...

Коми парма-ягын йөлөгагыс шог...

Кадыс — война бөрын.

Кадыс — звөн-струна.

Видз-муын и вöрын гымалö страна.
Праздникын суббöтник,—
Карта тшупö сикт.
— А ме абу плöтник,—
Шуö Веня-псих.—
Менö пыдзны тырмас!
Абу римса раб...
— Гашкö, миян пыр на лэдзавны караб
Ниа увса ёльöд,—
Кывт вай, газеттор!?
Кадыс тай эз кольöд
Ёльса ворсантор...
Августалы серам:
— Веняöс эн ёр.
Нывъяскöд мый керап,
Радейтöны кор.
Ачыс рытъя клубö вайö сьыланкыв.
Морöсыд кө лыбö, кызди нö он сьыв!
«Комийö дай муый,
Яла яганöй.
Ниаöй дай пуый,
Шöвк вöнь туганöй...»

IV

— Ниа сирсö някляв,
 пиньнад сэк он ляб,—
Шулис баб, эз бакъяв,
 сё во олис баб.
Вöли синма-целя,
 вом тырыс на пинь,
Кылыс вöли «желля»,
 ачыс кыз би кинь.
Пöжалö и пуö,
 видзö баля-мös,
Мöстөг йöзыд, шуö,
 сийö öмöй йöз.

А ми өктім мамкөд
азь да гөнбө гум,
Коляоз — гөрд камнет;
пуим урбөж юм.
Сакар пыдди солөн
юим турун чай,
Гижим письмө: «Олам
бура, дона ай...»

V

Венім, ставсө венім.
Эг и вөвлөй тшыг.
Эг-ө эмас өні
Этша ачым тшык?

Оз тай инась лолөй,
Йирө пучей-шог:
Мыйкө нөшта колө-й
Вөчсьө ковтөм ног...

Мөдлапөлын тури
Горзө: курлы-кур!
Шоныд позйыс сюри,
Тыдалө, и бур.

Ыб сай сьөртын тарьяс,—
Тувсов парма гор.
Пычкысьөма гарйысь
Ниалөн веж кор.

VI

Радейті ме
нылөс,—
яг выв чөдлач син.
Вошті сямөс-кылөс,

овны абу ин.

Августа

эз вөв кө Венялөн ныв ёрт,

гашкө-й, олі төлкөн,

аслым лёк эг ворд.

Но Сибирё муніс асьсё корсьны зон.

Уналөн нин вуніс.

Но он вунёд, он,

өти парта сайын пукавлін кө дыр,

шогсё кө тэ вайин мөдлы морос тыр.

Виччысьё, оз виччысь муса зонмөс ныв, —

некодкөд оз йитчысь,

некодөс оз кыв...

Августа-суседка, ворсөмъясын дөв,
олис бабкөд-дедкөд, бать-мамыс эз вөв.

Шуи со и джөмді.

Пиньёс курччи гөтш...

Төдім:

Вөлі көнкө мам,

и батьыс тшөтш.

Деньга и пөсылка вайліс почтальон,

но эз казътыв нывка, коді мынтө дон

өтчид мырддьөм шудысь, —

бать-ө?

төдтөм ань? —

вөлі вердысь-удысь нывкалөн — и шань.

Мунліс мөдкөд

мамыс,

воюйтис кор бать...

Ой тэ, дас көкъямыс!

Ой тэ, воштөм садь...

Асьным

өні дурам:

муслун

пөт оз төд.

Сьөлөмам и юрам —

СИЙӨ.

Сылөн — мөд.

Паныдасиг кежас либө дзебас син,
Тувсов мулөн эжас өтка катшасин...

Өтчүд

шутөг-кортөг гортө пырис:

— Көн?..

Ме тай чайті, ортөг ёртасьөмлөн сөн...

Вом дорас ни чуняс помада ни лак,
ыджыд синсө куняс, вошө пожом яг.

Төді кө, эг висьтав, сэтшөм лои жаль,
шуа, өдва лысьта:

— Веня — чегөм чаль.

Вай эн шыра-канясь,

мена́м,

мена́м ло!—

Нывъяс ой-ой шаньёсь,—

шуйс:

— Оз нин во...

Сизим морта көлысь ворсім.

Гажа рыт!

Төлысь бөрся төлысь лайкөдө му гыд.

Анькөд орчөн шоныд,

Сыкөд небзьё кыв.

Кута гортө воны, радлө ывла выв.

Нюмө асья шонді,

сералө зіль ю.

ыб дор васөд сёнти пышійө көдзыд ру.

Шуда, абу шуда аньёй,—

уджач, рам, пуө, вердө-удө...

Регыд лоис мам.

Сэн и ме, ог ошйысь, сиктса активист,

ёна көть эг вошйысь, лои коммунист.

Төрытьяыс вуні,

выль и төжд, и шог...

Өтна́м вөрө муни, вөлі, эз-ө мог.

Коми мортлөн нэмыд:
рас да сьорт, да яг.
Вөрыс сук да пемыд, вотос эм и тшак.
Эз кө вөвны найо, гашкө-й, ме эг вөв?..
Шондыс вөр сайо лэччис.
Сэт-тшөм чөв.
Чөвсьыс пельыд потө,
ышмө мудзөм лов.
Мөдтор парма отө нинөм оз и ков.
Вольпась-нитшө шыбит асьтө,
паськөд сыв...
Морөсыд кө лыбө, кыдзи нө он сыв.
«...Шуньгө югыд гожөм
Шоныд августөн.
Ниа дорын пожөм —
Менам Августа...»

VII

Коркө-й лэбис тури,
киссис ниа лыс,
ёльсө көдзыд пурис...
Лызьө зэвті кыс,—
көсья вөрө кайны,
көть оз тшөкты ань,—
радейта ме вайны
пиуклы «көч нянь».
Пиук, кыдзи көчуль,
чеччалө сэк, рад.
Весиг пөрысь пөчуль
казытылө том кад.
Лазйө пажын босьті,
истөг тшөтш эз вун,
сарай өдзөс восьті,—
некытчө эг мун.
Паныд пырис дошлөй,
гожъялөма, кос,

Веня.

— Кытчө вошліи?—

Зымгис коньяк доз.

Көсичаыс эзысь,

мудзём вөвлөн син,

кылыс пөсьөн резысь,

аслыс абу ин.

— Шөйти муті-ваті,

зен ни горні эз тыр.

Муслун ветліс маті,

сьөлөмам эз пыр.

Луныс — удж ни олём,

кадыс — ёрт ни друг.

Збоялём ни полём

некодкөд эг юк.

Олі — аслым мустём,

дасьты көть горт пөв...

Эз кө вөв Августа,

гашкө-й, эг нин вөв...

Шөйөвошис аньөй,

да и мейн дзуг...

— Менам сійө, Ваньө!

Сет, сё муса друг...

Сулалам ми гозъя,

өшөдөма юр,—

дзоридзыс оз розъяв,

югөрыс оз сюр.

— Ме өд абу көлуй!—

шуис сәки ань.—

Шоммас морөс йөлөй,

эновтас кө Вань.

Да и тэнад, Веня,

ме эг вөвлы, эг,

ставнас пиа-эня

ми — Иванлөн шег...—

шуис да, и эштіс

панссытём на вен,

гыма кымөр вештіс
менама «гортса ен».
— Юам! — шуис Веня. —
Ми эг юлөй көн!..
Кыліс дзиня-дзенья
румкаяслөн звөн.

VIII.

Он и төдлы, кольё,
вешйө вой да лун.
Пышйө ваис ёльөд,
кадыс оз мөй мун.
Олан сиктөй выльмө,
бырө керка шуй.
Йөзлөн көсийөм збыльмө, —
карөдз шыльыд туй.
Өшинь улын ниа
быдмө ён да кузь.
Шондыс бур сийө,
кодй дыр оз узь.
Веня сиктын олө,
вөчө ассьыс удж,
Уджыс йөзлы колө,
сөмын состө пудж.
Грездьяс костын туйыс —
пидзөсөдз на няйт.
Ёртөй сэн и шуис
«дорыштны кузь шайт».
Өктө сэтшөмъястө,
кодлөн «ворсө вир»,
Райсельдоручасток...
Веня — бригадир.
Миян пилы шусис
вежайөн — рөдвуж,
Кортөг гөсти усис,
мунны бөр эз куж.

Вежапикөд мелі,
 Августакөд бур,
 Мекөд венө келө.
 Олө — аслас юр.
 Газетад сатира, шуө,
 ном оз кый,—
 Ошкөмторйыд чирө,
 кызди совтөм вый.
 Ошкөм, шуа, тожө
 содтө вын и өд...
 Важ моз вензям чожа,
 еджыд мый да съөд.
 Йөз син водзын содіс
 Венялөн морттуй,—
 Пельпом вылас водіс
 став районлөн туй.
 Партияө пырис,—
 исполкомлөн кадр...
 Венялөн бур нырис,—
 сы дор вөлі кад.
 Да и ме со сэтөн
 вомөс видзи тшим,—
 Ошки на газетын
 бригадирлысь ним.
 Кыдзи ёртлы эски
 Венялы ме век.
 Бөрйыси невеста
 сылы тшөтш. И сэк
 Письмө меным воис,
 письмө-аноним:
 «Веня другыд лоис
 гөтырыдлөн нин...»
 Съөлөм сувтіс. Кыла —
 ачым аслым враг.
 Көкөй быттьө сылө,
 ки оз лэпты-й чаг.

Битөг тшын оз овлы,
ватөг би оз кус.
Некодись эг повлы,
повзи, кызди трус:
Ныла-пиа миян!
(Чужис нин и ныв).
Мый нө ныла-пиа
коркө шуасны?..
Чавкниті письмөсө,
мед оз төдлы мам.
Морт кө овны көсйө,
көртвомалө сям.

IX.

Ельөд пыж он кылөд
Да и караб, дерт...
Олөмтө он ылөд,
Сьөлөмтө он берт.

Ворса авъя пикөд:
— Кекө-кекө-нач...
Пачводз дорын битөг,
Көдзалөма пач.

Пуны мам оз көсйы
Ичөт пилы рок,
Шоныд сыв оз вөзйы...
Гортө мам оз лок.

Шуис: «Ваньө, прөстит,
Веня — менам шуд».
Муніе. И эз гөсти.
И оз бергөд суд.

Веня кө, и Веня,
Лэбачлы и — борд...

Олөм — триня-брентя
Торпыриг... А морт?

Мортлы колө овны.
Кыдзи кужан, ов.
Нинөмторйысь повны
Мортыдлы оз ков.

Морт олөмыс помтөм,
Шуа бөръя кыв,
Батьёс пиыс шонтө...
Мыйла тшөтш оз
Ныв?..

Ворса дона пикөд:
— Кекө-кекө-нач...
Морёс пытшкын битөг,
Көть и ломзё пач.

Х

Висьталёны,
ниа олө витсё во.
Вөчөмторйыд менам сэтчөдзыд оз во.
Сисьмас керка-карта,
вушъяс гижөм кыв,
пач, ас киён вартөм, асья мойд оз сьыв.
Но ме төда, олас сэтчөдз менам рөд,
олас да и колас...
Кодлы?
Мыйла?
Төд...
Кадыс сэтшөм тэрыб, шондї сїдз оз кай,
аски НТР-ыд мыйсө и оз вай.
Видзөдлыны эськө сэкся выль кино,
кайлыны Му весьтө
космонавтөн.

Но

меным нин ветымын.

Пенсияөдз — дас...

Шойна-Ягын кымын тиөтшъялы пу пас.

Жаляддза ме дзорга, көн жө аслам пом,—
юрси абу дзор на, шмонитө на вом.

Сідзкө, олан көвйыс вугсьыс эз на мын,
сідзкө, и горт пөвйыс век на мыр йылын.

Мый көть и ветымын,

абу на дзик жуй...

Батьлы вөлі сымын, босьтчис вөчны туй.

Кыпөдіс став сиктсө:

— Бырөдамө няйт!

Бырөдны, дерт, дзиксө некоді эз чайт.

Кодкө весиг помис, дзевис вөв и додь.

Сөмын уджлөн помыс вөлі мойдын кодь.

Казьтылөны өні ыджыд сиктас сэн:

— Мир туй вөлі — сөнік, лоис, кыз цемент.

Ставөн — сельсөветө: «Ми — Сөветъяс дор!..»

Батьө вөлі сэтөн медводдза парторг.

Кадыс вөлі сэтшөм:

ышнясис кулак,

аслас көин этшөн эргис дзевсьөм враг.

Выльсө-й вөрөг кылө, көсийө али оз.

Кодкө-й гижас вылө:

«Сиктын кулак поз,

и парторг

кулачник...»

Эскөма район.

— Пуляөн көть швачнит кымөсад, да он,—
казьтивліс бать,—

Зывөк вөлі полысь лов.

Ленинскөй призывөн локтін кө,

и ов!

Коммунистав асьтө помөдз.

Киад — власть.

Мунны Сöвет властькöд абу быдöн дась...

Коркö сэки меным мамö сетас лов.

Батьö шуас: «Венам! Дорйысь мöд оз ков».

Мортыс вöлöм шмоньлив.

Шмонькыв — вына кыв.

Кынмылан ли, он ли, шмонитин — и сыв.

Сэк и ваяс вöрысь ниа понöль пу,

гутор кодъяс йöрысь, садитас — и ту.

Меным шуас: «Быдмы ниа пу кодъ ён.

Быдöнлы эн гыдмы.

Дорйы Выль Закон.

Партиялөн туйöд восьлав,

джöм эн тöд.

Сöмын тадзи туйö выльмöдны морт рöд».

XI

Видзöда ме öтчыд:

ниа дорын йöз.

Туй пö кутам вöчны.

Веня сэни грöз:

— Сорö ниа пуыс!

Дась нин пила-чер.

Вөрзис кок ув муыс,

пемдiс ывла сер,

Дугдiс сывны ябыр,

му вылын кор май,

Шойччытöг октябрын

лэбö юренькай...

Шуа: «Туйыс тöрас,—

орччөн паськыд луд.

Мыйла пырны йöрас,

торкны йöзлысь шуд?

Пуыс рöдлы менам,

кыдзи аслас пи...»

— Ха! Пöч мойдъяс венам.
 Пулөн доныс — би.
 Кералам дай — пескö,
 ломты ассыд пач...
 Овны накöд дзескыд,
 кодлы веськодъ нач:
 Кытчö мунны, кытi,
 кутшöм туйяс пыр...
 Ачымöс эг кут и...
 мыським тырдöсь пыр.
 Ёльöд кывтiс «парус» —
 газет караб-пыж...
 Көн тэ, сизим арöс?
 Көн тэ, менам мыж?..
 Көн тэ олан-вылан,
 кодлы ме эг ков?
 Көн тэ, менам сылан, —
 ловъя вира лов?..
 «...Комиöй дай муöй, —
 Синмöс восьтысьöй.
 Ниаöй дай пуöй, —
 Сьöлöм косьтысьöй».

БÖРКЫВ

Кокниа мый сетсьö,
 Паметяд он суй.
 Тышын-косьын тэчсьö
 Олöмö выль туй.

Сы вöсна и менö
 Чиршöдлöны пыр:
 Век пö каян стенö,
 Увтиыс он пыр.

Ог. И кытчöдз ола,
 Вуджа стен кöть сруб,

Сола, шуа сола,
Дуб кө, шуа дуб.

Кычи моз ог йөкты,
Кань моз кок ог нюв,
Озырлун ог өкты,
Корысь моз ог «кув»*.
Сөнъясөс ог личөд
Сьөкыд уджын. Ог
Көпейка пыр видзөд
Олөм вылас. Мог
Пуктөма ас водзө:
Восьсөн кутны син,
Аддзыны мед позьө
Веськыд мунанин.

И ог эскы сылы,
Коді нор да пяр,
Юрөс кута вылын, —
Видзөд сикт и кар!

Көть и новла эськө-й
Вылысам импорт, —
Гөгөр ме советскöй
Ачым, коми морт,
Комсомоллөн быдтас,
Партиялөн вын.
Өтнам — ичөт лыдшас,
Но и абу джын.

Төдө менам сьөлөм,
Правда көн и лөж.
Пельпом вылө сөлөм
Ас му вөсна төжд.

Корысь моз кулө — шусьөг. Петкөдлө няргөм,
сьөм.

Аслам олігчөжөй
Рудз эз куйлыв сой,—
Мед и пий-бөжөй
Прөста нянь эз сөй.

Му вылын көть вөрын,
Мед эз шу: «Ог куж».
А, кыз пуыс йөрын,
Лэдзис асьыс вуж
Аслас чужан муо,
Кодлөн паськыд от...

Дона ниа пуөй,
Бөрддзөдін тай вот...

Видзөда тэ вылө,
Аслам ловлөн пу,—
Синмөй дзоргө ылө,
Кытчөдз мөвп оз ну.

Витсё во мысьт воас
Кутшөм-сэтшөм нэм?
Унджык быдтор лоас?
Али оз ло нем?

...Муыс вөртөм-ватөм...
...Абу сикт ни кар...
...Водород ни атом...
...Йизьөма Му шар...

Эска, татшөмторсө
Вөчны морт оз лэдз...
Тыш-кось — сөмын ворсөм,
Чача — танк и меч...

Көсьян, гөсти петав,
США-өдз лэб;

Көсьян, эм ракета,
Марсө асьтө дзёб.

Өшинь улад ноксы,
Мунны кө нин дыш,
Муад-садъяд коксы,
Эн көть шойчөд мыш.

Ниа пукөд орччөн
Кисьмө апельсин...
Суседыд оз ёрччы,
Абу завидь син...

Бырис правда корсьысь...
Бырис дефицит...
Анонимөн ёрсьысь
Некодос оз вид...

Быдөн сөстөм киа...
Ставлөн садя юр...
Быдмө м и я н Н И А,—
Пөрөдысь оз сюр.

Сы вөсна и ола,
Сыысь ме и рад:
Олөмыслы кола!
Олөм, сійө — кад.
Кадыс, кыз и ниа,
Корө мортлысь төжд.
Сэки-й туйыс миян
Выльмө олігчөж.



ЮРИНДАЛЫСЬ

Чужан му	5
Рас	5
«Поэтён, гижысьён он чуж...»	6
«Ме ола и лолала...»	7
«Ме, гашкө, тэныд...»	7
«Эм коми ань...»	8
«Ас вöсна сöмын ме ог ов...»	9
Быдён ачыс	9
«Зэв гажаа ме коллялі томдыр...»	10
«Ме книга радейті...»	10
Воис төв	11
Ме	12
Мыйла нö?	13
Федерико Гарсиа Лоркалөн паметьлы. <i>М. Дудинысь</i>	13
Булат Окуджава эстрада вылын. <i>М. Со-</i> <i>больысь</i>	14
Менам народлы. <i>С. Капутикянысь</i>	16
«Бур плётникö ме ог и пуксьы...»	18
«Тэ кыин зарниысь браслет...»	18
«Выльдзык йöзысь гажöй бырö сик- <i>тын...»</i>	19
«Бара öтнам ю вылö ме петі...»	20
«Тэ кывбурьясöс менсьым вай эн <i>кулит...»</i>	21
«Коді эскас менам висьöмлы...»	21
Гөрöдьяс	22
София	27

Варнаын коми сыланкыв	28
Албена	29
Габровоса шмоньясысь	29
Кык кывбур. <i>С. Пенчеваысь</i>	30
Сөвмөм муслун	31
Веж луд вылын ныв-зоныс оз сьыв	32
Революция	33
Сёрмөм мөвпъяс	36
Яндысысь	36
Чужанін	37
«Кытөн быдмө нёля ниа...»	39
«Ю веркөсын ворсіс чери...»	40
«Вояс лэбёны, волёны ۆтчыд...»	41
«Юыс мөвпалё да лөнь...»	41
Гожөм	42
«И помасьтөм, и тэрыб оланногыс...»	
<i>А. Смольниковысь</i>	42
«Пышйыны эськө да дзёбсыны сиктө...»	
<i>А. Смольниковысь</i>	43
«Али мукөдсыс тэ мича...»	43
«Бара тэ йылысь ме сыла...»	44
«А сыын өд и лёкыс, асьсө быдөн...»	44
Автолавка	45
Тэ вөлін шофёрөн	45
Медся коми морт	46
Эскөм йылысь	47
П. Ф. Шаховлы	48
В. Д. Лёкановлы	49
Кузь туй (<i>Поэмаысь юкөн</i>)	49
Некоді эз вид	53
«Радио, пыр кылі...»	55
«Лөнь руын кар...»	55
Видза олан, Қослан!	56
Удора	58
«И со эн лок...»	59
«Водз тай зэв чеччөдө...»	60
Көйдыса во	61

«Ті бөбйөдланныд асынытө, чайтанныд кө...» <i>М. Танкысы</i>	61
«Гашкө, сысы, мый сиктса ме мор- тыс...»	62
Томан йылысы	63
Мортяөн вын	64
Воклы	65
Шонді бердлөм	66
Пызансайса	66
Өтка чом	67
Гижасысы черань	68
Ог уджав, а сёя	70
Том олөм	71
Мозын вылын	71
Муза	72
Шуд	73
«Лыдтөм дзоридзөн ойдөма видз выв...»	73
Сьөлөмөй тани	74
Ми шудаось	74
Медбур стих	75
Пөртмасысы Войвыв	76
Нөшта өти тулыс	77
Утка кыйөм	79
«Кодкө нёровтис понөль...»	80
«Тшөкыда мем шуоны...»	80
Медводдза лым	81
«Ме тэнө виччысли...»	81
«Тэнад киясыд ньөжмыдөсь талун...»	82
«Нывбабалөн мичлуныс...»	83
«Ме тэнө радейта...»	83
«Кор тэнсыд китө босьта аслам киө...»	84
«Помнитан, кызд виньдис көкыд...»	84
«Большоны йөзыс зэв уна...»	85
«Муса аньөс өтчыд дойді...»	85
«Яла яг вылын вотам ми чөд...»	86
Эжвакар. <i>Поэма</i>	89
Туй дорын ниа. <i>Поэма</i>	99

Васютов Ю. К.

В 20 Кӱйдьса во: Кывбуръяс, поэмаяс.— Сык-
тивкар: Коми книжнӱй издательство,
1990.— 128 л. б.

ISBN 5-7555-0225-0

Кывбуръяса вьль книгаӱ пырисны кык поэма да кывбуръяс.

Лирика да гражданскӱй гӱлӱса поэзияын автор оз кеж аслас воддза темаясысь: вӱр-ва радейтӱм, муслун, олӱм йылысь мӱвпалӱм, юасьӱмъяс, сувтӱдӱм проблемаяс, коми сикт. Танӱ жӱ роч да мукӱд кывъяса поэтыаслысь вуджӱдӱмъяс.

84 Ко—5

Юрий Константинович Васютов

ЩЕДРОСТЬ

Стихи и поэмы на коми языке

Редактор *А. В. Тентюков.*
Художественный редактор *В. Б. Осипов.*
Технический редактор *А. Н. Вишнева*
Корректор *М. М. Лужикова.*

ИБ № 1546

Сдано в набор 11.01.90. Подписано к печати 15.02.90.
Ц00118. Формат 70×90^{1/32}. Бумага № 1. Гарнитура
Обыкновенная. Печать высокая. Усл. печ. л. 4,68;
усл. кр.-отт. 4,83; уч.-изд. л. 5,17. Тираж 1000.
Заказ № 2307. Цена 80 коп. Коми книжное изда-
тельство. 167610, г. Сыктывкар, ул. Карла Марк-
са, 229.

Головное предприятие Коми республиканского по-
лиграфического производственного объединения.
167610, г. Сыктывкар, ул. Первомайская, 70.

3000



W. H. H.

